

KUTEETA BWÀ KWENZELA

NZAMBÌ MUDIMU KACIYI

DISWA DYÀ NZAMBÌ



Tùshaalààyikù biimànyine kuulu mpindyewu bwa katanci patùdi twenza disambila apa. Twìnyikààyi mitu yetu.

Mukalenge, tudi ne disanka mu dinda emu bwa kwikala baalùkile mu nzubu wa Nzambi, mu dikwàbò disangisha. Nenku tudi tulomba, Nzambi, bwa Wèwè kutùlongololakù mu dinda emu ku bilema byetu byònsò. Tùleejèku kajila kaùdi Wèwè mutume díyi bwa twètù kwendelamu. Ne tùpèeshèku ngàsà ne dinanga Dyebe, bwa twamona mwa kulonda tujila atu ne mèyi a kulonda awu ne myoyi yetu yònsò, bwa twàsanganyibwakù, mu dituku adi, mu Kilisto, katùyi ne kadyuwù, bwalu tudi twitabuuja, Mukalenge, ne dimweneka Dyèndè didi abidi àdi panshi aa.

2 Tudi tumona bimanyinu byònsò byàkambàYe ne nebyènzekè ku Dilwa Dyèndè abi, munkaci mwa kukumbana mpindyewu. Nenku ne disanka dyònsò tudi bindile dyôdi díbà adi. Anu mùvwà Abraham wa kale awu mwindile mwànà mulaya amu, nenku pa kumona bimanyinu bya ndekeelu bya Nzambi abi bipweka pa buloba, díbà adi yèyè wàkamanya ne kabivwa mwa kwenza ntàntà mule mwànà awu kàyi mulwe to. Ne mpindyewu nyewu tucìmona cyènzeka cyakabidi. Yesu mmutwàmbile ne: “Pàabangà maalu aa kwenzeka,” twabànduluka, bwalu bupikudi bwetu—bwetu bùkaadi bùseemena, “dipampakana dya cikondo, dikenga munkaci mwa matunga, dikanka dya buloba mu myaba mishilèshilàngàne, mbù ùkungula, myoyi ya bantu yàmba kwimana bwa bwôwà.”

3 Tudi bamanye ne tudi mu dyôdi díbà adi, mùdi matunga kaàyi mamanye cya dyenza. Mvita mikwabo yènda yilwa, mùdibi bimwèka. S'ncifwànyine kwikala cintu cya cikwacisha bwôwà's! Buloba munkaci mwa kukòsoloka, beena maalu a mamanya bàmba ne cintu kampanda cya cikwacisha bwôwà cidi pabwipi. Tudi tumona Bible wàmba cyôci eci. Nenku, Mukalenge, tùkwacishèku leelu ewu bwa twikalè biimàne mu nzubu wa dilongolwela bilema ewu, ne tùpetèku mèyi matùma a kùdi Nzambi wetù, bwa kuya kumpala mu díbà dya mîdimà edi, bwa kukenkesha Bukènkè, bwalu ncifwànyine kwikala wetù mpùngà wa ndekeelu bwa kwenza nanku. Bwalu tudi tulomba nunku mu Dinà dya Yesu ne bwa bwalu Bwèndè. Amen.

Sòmbaayi.

⁴ Ncya bushuwa ne ndi mbala eci bu dyèsè dinene, dya kwikala mwaba ewu mu tabernacle mu dinda emu. Kadi nwatùfwilaayikù luse bu mutùdi katùyi ne myaba ya kusòmba, myaba yònsò, bweni nwènù. Ne mwaba mwine mmùle tente, ne bantu biimàne kuulu myaba yònsò pambelu.

Nwènù bàdi pambelu abu mpindyewu, nudi mwa kuumvwila cyôci eci ku bisanji byenu. Nyewu ngápù mwoyi. . . [Muntu kampanda ùdi wàmba ne: “Makumi ataanu ne itaanu too ne ku makumi ataanu ne mwandamutekete.”—Muf.] Makumi ataanu ne itaanu too ne ku makumi ataanu ne mwandamutekete. Nwènù bàdi pambelu abu, ne mu myaba ya kwimanyikila màshinyi mwàmwa, ne mu misèsù, nudi mwa kuumvwila cyôci eci ku bisanji byenu, pankaci pàà makumi ataanu ne itaanu ne makumi ataanu ne mwandamutekete pa kalonda kàà cisanji cyebe. Pa nanku tudi bateete. . .

⁵ Mwva mwalùkile, menemene, mulwe kaaba aka, bwa kuteetakù bwa kwenza masangisha a matuku dikumi, bwa kwakula pa cyena-bwalu cya *Mpànzà Yà Ndekeelu Mwandamutekètè*. Bwalu, munkaci mwa Mpànzà ayi mùdi Mpungi. Nenku mvwa nzwambila mu. . . pàmvwà ne cya kuyiisha pa Mpungi Mwandamutekete ne, nèmbitwàlè pamwe ne Mpànzà ne Bipùpù. Nenku mvwa ngeela meeji ne ncifwànyine kwikala cikondo cimpè. Ncivwa mfùminakù ku Afrike, ne—ne bàna kabàyi banji kuya mu diikisha to.

Mwanàànyì mukese wa balume ewu, Joseph, ùvwa—ùvwa bu mulwe ndambu. . . ne dijinga dya ndambu wa mbingu bwa kulongakù pa mushindu wèndè wà kubala. Ùvwa mubànde, eyo, kadi kàvwa pa cipidi cikumbàne to. Pa nanku twètù kumulama mu Tucson, pa nanku, pàmvwà mu Afrike apu, nenku yèyè kutungunuka ne dibala dyèndè adi ne kudipetululayè mu dyôdi, mu tulaasa kampanda.

Ki pashìishe twètù kwalukila. Nenku mvwa ngeela meeji ne, pàvwà bàna mu diikisha apu, mvwa mufwànyìnekù kwenza kaadisangisha kakese mwab'ewu ne bantu, bwa kuyiisha byena-bwalu ebi. Kadi patwàfikì muneemu, twètù kusangana ne katùvwa mwa kupeta dibàlaasà dya tulaasa adi to.

⁶ Ne mèmè mvwa mumanye ne tabernacle kàvwa ùkumbana bwa kupèesha bantu myaba ya disòmba to, ne kubàshiyakù bacyankàme mu mushindu wùvwàbi bìkèngela bwa bòbò kwikala pàdìbo. . . pàndi nyiisha Diyìisha edi apu, ki bwa cinyi kutùkèngelabi bwa—bwa kulongolola maalù mushindu mukwabo. Nenku pamutu pàà kwangata malòòlò dikumi atùvwa tulongolola bwa kwangata awu, ee, ndi mucìvwijè anu bwa masangisha abidi mu dyalumingu dyònsò; edi dyalumingu, dyalumingu didi dilondà, ne dyalumingu dyàlondà adi nanku,

masangisha abidi abidi. Pa nanku, kadi twètù biine katwènakù bacifidile dimanyisha to.

Nenku, dîbà adi, bu muntu muumvwè mu mushindu kampanda bàmba ne masangisha àvwa ne cya kubanga mu matuku a ngondo makumi abidi ne mwandamukulu, ku dîbàlaasà dya tulaasa aku, bu Nzambi mwa kwanyisha, ee, wèwèku ne balunda ne mwikàle ne myaba milamisha ku bilààlà-beenyi, ndi—ndi muswe—cya kwenza nkuumusha dilamisha adi, nwamonu's, bwalu bàdi—bàdi, katwena ne mushindu wà kupeta dyumvwangana bwa kupeta mwaba awu to. Kabeena mwa kupeta màbàlaasà a tulaasa awu to.

⁷ Nenku mpindyewu, ndi muswe kwakula anu pa masangisha a butangadiki mu dyalumingu mu dinda. Ne mu dyalumingu dilòlò ndi muswe kwenza disambila bwa babeedi. Nenku tudi ne dyeyemena dya ne Nzambi neàtwillanganèku neenu nwènù bàdi babeedi abu. Ncyèna mumanye mwikalà Billy mwa kutàngila bwalu bwenu to; ndi ncinka ne, yèyè neàbanyè twarta twa disambila, anyi mwònsò mwènzàye amu, mushindu wa kukòntonona bantu. Kadi netwènzè cyònsò citùdiku mwa kwenza aci bwa kusambidila muntu ne muntu mu mbingu yònsò yisatu yitùdi tujinga bwa kwenza masangisha eyi, cyòci ciikàle diswa dya Mukalenge.

⁸ Ne pashìishe misangu yàbùngì kùtu miyiiki ya babidi, muntu kampanda muswe anu kumonangana neebe katanci kakese pa cintu kampanda anyi cintu kampanda cya mushindu awu. Nenku netwikalè mwa... Mbanganyi mwab'ewu bàdi baswe muiiki wà babidi? Tùmonààyibì cyanza. Éyì! Washààla nganyi? Pa nanku tudi...

⁹ Nebìikalè bikole ndambu bwa kutwilangana naabò, pa nanku fùnda dilomba dyebe ùditùmè, nùàfilaaayi kùdì Billy, dîbà adi mèmè ndi mwa kuàngacila kwòkù aku. Nenku, mpindyewu, yèyè neàfilè dimanyisha, ngeela meeji, bwa twarta twa disambila, dîbà dyònsò dyàkèngelàbi bwa kutwàbanya adi.

¹⁰ Mbanganyi bàà ku bàna beetu bambi bàdi kaaba aka mu dinda emu? Katwena bapete mpùngà wa, ncyèna ngeela meeji ne... Nudi basekèlèlekù bamwe bàà kùdìbo anyi? Mbanganyi bàdi bambi kaaba aka mu dinda emu, nudikù mwa kwela byanza muulu anyi? Anyi, juukilaayikù kuulu. Tùmonèbi ne mbambi bùngì kaayi bàdi mu disangisha mu dinda emu. Ee, mbìmpè! Mukalenge twasakidila bwa bantu aba. Mvwakù mwa kujinga bwa twìkalakù ne dîbà dya kusekelela muntu ne muntu wa kùdìbo, kadi ndi mutwìshìibwe ne nudi babàmòne. Nenku tudi... Nzambi mmubàmanyè mu mudimu wàbò, ne tudi tulomba bwa Nzambi àbàbènèshèku mu mushindu mubanjiike. Nenku, kakùyì mpatà to, bààbùngì bàà kùdìbo mbakàngè masangisha àbò, bwakwikalabo mwaba ewu. Mwaneetu Junior Jackson, ngeela meeji, ne Mwaneetu Don Ruddell, ne kwòkù aku

tudyòmbà etu tùdì tùkafika mu ekeleeziya yabo. Ne pashiishe, kabidi, mu New York ne mu mikwabo myaba mu ditunga dijimà, eci cìyaayakù kupicila ku telefone ya bantu mu ekeleeziya ne ekeleeziya yònsò mu dinda emu.

¹¹ Ndi ne disanka dya kumona Mwaneetu Richard Blair musòmbè mwab'ewu. Ndi mfuma ku dibala mukanda mumfùndila pa cintu cinènè cidi Nzambi mwenze munkaci mwa bantu kuntwaku. Dituku adi, mùndi ngumvwa bamba... Ndi mwa kwikala mutupakane's, Mwaneetu Blair; mèmè mutupakane, ùndongòlòlè. Ùvwa wènza mudimu, wàmbulwisha muntu kampanda ku dyela dya nshinga ya nzembu mu ditempu dya màshinyi anyi cintu kampanda, ngeela meeji mmùvwàbi. Ndi mubale mukanda mumfùndila awu. Kadi kupindulabo cintu kampanda, nenku, mu mushindu kampanda, kutùmaci nzembu mu màyi mùvwà mwànà wa balume mutekete ùsanganyibwa, umwe...mu—muntu mwena ditempu dya màshinyi adi, mwanèndè mutekete wa balume, kànà kàà balume kakese nàka's, nenku kushebeyaci mwanà mutekete wa balume awu. Ne difu dyèndè kuuladi. Tudi bamanyè cikùminà cya nzembu aci, mbwena kwamba ne, pàdiye ùfwa, ki cidi cyènzekà. Twisù tukese atu kupàtukatù mu nyama; mènù kudikàngawù.

¹² Kukwacishaci bânà beetu bàà balume abu bwôwà bya bibi be. Mwaneetu Blair kwelaye meeji ne uvwa mwa kumpeta mwaba kampanda, bwa mèmè kusambidila mwànà awu, kadi kuvulukaye ne bivwa ne: "Mwaba wònsò wùdì babidi anyi basatu badìsangishe mu Dìna Dyànyì, Mèmè ndi mwaba awu munkaci mwabo." Kadi taatù ùkaavwa mufyonòke minu pàvwàye ùteeta bwa kubweja minu mukana mwa mwànà wa balume mutekete awu, bwa kumùkàngula. Kadi bôbò kutwà binù e kudìtwabò mu disambidila mwànà wa balume mutekete awu, ne yèyè kwalukila cyakabidi ku mwoyi.

¹³ Cìvwa ncyà bushuwa anyi, Mwaneetu Blair? Umwe wa ku bânà beetu bàà lulamatu mwaba ewu. Kaa, mwànà wa balume mutekete awu's ùdì kaaba aka. Ee, Mukalenge twasakidila. Abi mbìmpè be. Tudi baswe bwa ùjuukilèku kuulu, wèwè mwanàanyì wa balume. Mpindyewu, tudi twela Mukalenge munanga twasakidila bwa cyôci eci. Awu ki tatwèndè mwine wa mwànà wa balume mutekete awu anyi? Ki wèwè tatwèndè anyi? Ncyà bushuwa. Nenku's ki Mwaneetu Richard Blair nyèyè ewu. Nzambi wetù twètù ùdì ne bukole bwa kwenza cintu kanà cyònsò. Eyowa's, mukalenge. Yèyè mmucilayè. Tudi ne mwoyi mu Bwikadi bwa Nzambi, bwa Taatù wa mu Dyulu, munene, wa butumbi. Ne bintu byònsò bitùdì. . . bidi mwa kwenzeka bu twètù anu mwa kuciitabuuja.

¹⁴ Nudi numona cidi cyôci aci cyènza, difutu dyàkafilàci bwa nsòmbelu wa muntu awu pa kwitabuuja cyôci aci anyi? Cyàkasùngila mwanèndè mutekete wa balume awu. Mpindyewu, Nzambi ùvwa ne basadidi Bèndè bàà lulamatu kuntwaku,

bwa... Mwaneetu Blair ne bakwabo abu, bwa kusambidilabo mwànà mutekete wa balume awu pàvwàye mu ngiikàdilù awu apu. Eyowa, pàdì bwalu kanà bwònsò bwènzeka, vùlukààyi ne, nudi bânà bàà Nzambi udi ne mwoyi.

“Mwaba wònsò wùdì babidi anyì bapìte apu badìsangìshe mu Dìnà Dyànyì, Mémè ndi mwaba awu.” Ne bààkafùnda kabidi ne: “Yèyè ùdì dikwacisha mene didì anukù dībà dyònsò mu dībà dya lutatu.” Kacya ní kùkaadikù lutatu, s’ùvwa mmwànà mutekete wa balume awu mulàadika mwaba awu, mufwe, panshi apu, ku cìkùminà cya nzembu yàkamubwelà mu mubidi ayi. Pa nanku tudi twela Nzambi twasakidila mu dinda emu, ne myoyi yetu yònsò, bwa—bwa maalù aa àdì Ye mutwènzèle.

¹⁵ Nzambi àbeneshèku balume bàà lulamatu aba, bóbò pààbò. Mu cikondo cya njuwu ya cìmpicìmpi kì mu cyòcì cikondo aci mùdì mùkèngelà kweyemena Nzambi. Kadi ikàlà muMweyemene, ikàlà Nendè mu bulunda kumpala kwa njiwu ya cìmpicìmpi kulwayi. Tudi bamanyè bwalu ebu. Twètù tulengeleela Nzambi, tudi mwa kuMulomba cintu kanà cyònsò, mùdì mufwànyine kulomba mulunda mukwabo kanà yònsò ewu, ne Yèyè ùdì dikwacisha mene didì anukù dībà dyònsò mu dībà dya lutatu.

¹⁶ Mwawa mutuutakeene mu mùsèèsù, makeelela awu, ne mwanaabo wa bakaji wa Mwaneetu John Martin. Mwawa... Muntu kampanda ùvwa mungiimanyike mu mùsèèsù amu, ne muntu kupicilaye mwaba wùmvwà awu ne kunkùpayè cyanza. Mu dyalukila dya kumbelu, nudi bamanye’s, wèwè udi umona bantu myaba yònsò, bìimana bakwela mwoyi ku cyanza, ne bikwabo. Nenku inábànzà ewu, ndi mvuluka ne bàvwa bambìkile ku telefone anu abidi àdì panshi aa, bàmba ne kùvwa muntu kampanda mudituutè kùdì yèyè inábànzà ewu, mu kàshinyì, bamuzaazè mwongo kuumukila anu kuulu too ne kwinshi. Ùvwa ne cya kushààla mucibùkile panshi matuku èndè ónsò a mwoyi. Mmusòmbè mu disangisha emu mu dinda emu, munkaci mwa kusankila Bwikadi bwa Nzambi. Ndi mufume ku diyìkilangana nendè mu bìrò emu. Ndi muswe kusambila nendè, cyakabidi. Kadi ùvwa... Ùdì kaaba aka mwaba kampanda. Ngeela meeji ne kì mmupete mushindu wà kubwela cyakabidi to.

Kadi, monaayi, cya bushuwa, s’nyèyè ewu mmusòmbè anu mwab’ewu pabwìpì neetu apa. Ncya bushuwa. Udikù mwa kujuukila kuulu bwa katanci kakese cyanàànà anyì, mwaneetu wa bakaji, bwa bantu bààmònakù mwa... Ki inábànzà nyèyè ewu uvwa ngangabuka mwambe, kùkaadi ndambu wa matuku ne, kààdyàkwendelakù kuulu to, mwongo muzaaza ne bikwabo byònsò, bifùmìne ku njuwu—njuwu. Kadi’s nyèyè awu mwimànyine kuulu, mujimà ne bujimà bwèndè.

Nudi bamanye’s, Bible mmwambe ne: “Nenku kabàvwa mwa

kwamba cintu nansha cimwe cya cibèngàngàne naaci to, bwalu muntu awu ùvwa mwimane munkaci mwabo.” Ncya bushuwa. Mwànà mukese wa balume’s nyêyè ewu, mubiishiiḽbwe ku bafwe, ne mukaji ne mwongo muzaaza’s nyêyè ewu, mwimane kuulu munkaci mwetu. Abi mbidi bifũme ku dyanzeka, pa nanku Yêyè ùdi umwèumwè awu makeelela, leelu, too ne kashidi. Dînà dya Mukalenge dibeneshiiḽbwe! Mushindu mwine wùvwàbi bikèngela bwa twètù kwikala ne disanka dya kwikala ne mwoyi mpindyewu mu Bwikadi Bwèndè, ne kumanya ne Yêyè ùdi dikwacisha mene didi anukù dîbà dyònsò edi mu dîbà dya lutatu.

Ndi ne disanka dya kumònakù Mwaneetu Vayle, Mwaneetu Martin, ne bùngibù mwab’ewu mu dinda emu. Mukalenge ànùbènèshè nwènù bânà beetu, mu mushindu mubanjike. Mpindyewu bidi. . .

¹⁷ Ndi mumanye ne kakwena citaleela citàmbètàmbe bùngì munda emu, ne musùmbà wònsò wà bantu ewu, kadi pààbi, pàmvwà muumuke mu Tucson dituku adi, kuulu kùvwa kwa degrés mitwe ku makumi anaayi anyi makumi anaayi ne citùpà. Ne pabwìpì ne mundankulu, kuulu kùvwa kwa degrés makumi asatu ne inaayi, nenku kuulu nkwiimpè menemene bwa wànyì mubidi. Kadi ku Parker bàvwa bàmba ne kuulu kùvwa kwa degrés makumi mwandamutekete ne umwe, mu diitànù kumpala kwa twètù kuumuka. Nenku’s nudikù mwa kudifwànyikijila luuya lukole alu. Mu bushuwa bwa bwalu, amu mmu cipeela.

¹⁸ Nenku, mpindyewu, maadyalumingu asatu àdi àlondà aa. Leelu, dya dikumi ne itaanu, ngeela meeji, mmwômò anyi, anyi ndikumi ne isambombo; dikumi ne ataanu, kî mmwômò anyi? Dya dikumi ne mwandamukulu, ne dya makumi abidi ne mwandamukulu, ne dya kumpala dya ngondo wa mwandamukulu, (mmwômò anyi?) Ngondo wa mwandamukulu. Dya makumi abidi ne itaanu. . . Dya dikumi ne mwandamukulu, dya makumi abidi ne itaanu, ne dya kumpala, nekwikalè masangisha ku tabernacle. Kanwikadi, nudi bamanyè’s, kanwikadi nwâya katangalaja luumu alu bipitèpìte to, bwalu, nudi numona’s, katwena mwa kupetela bàdimu, bàdi apa mpindyewu abu, mwaba munda emu to, nudi bamanyè’s, nenku nebitambè anu kubiiḽpa. Wèwè alukila anu nàka pawikalà ne mushindu.

¹⁹ Ne ndi mwaba ewu mbwa kusangisha balubuludi. Mu mushindu kampanda ndi bu muumùshiiḽbwe mu byònsò ebi ne biikàle bàmbengela mwaba wà kwenzela disangisha, pààbi mèmè mulombòdiiḽbwe bwa kudyènza. Pa nanku ndi ngeela meeji ne nènkonkè ní katwènakù mwa kwangata ntentà wetù awu ne—ne kumwasa, ne kushààla anu mwaba awu, nudi bamanyè’s. Kupàtuka apa mu cipalu cya ndundu emu, anyi mu ferme kampanda, ne kumutentemuna kuumuka pa mwaba kuya pa mukwabo, anu mwàlombolà Mukalenge amu. Ne mèmè ndi ndyumvwa ne aci ki cyènzaYe. Nudi bamanyè’s, kùdi cikeena-

kumona pa bwalu abu. Ne ndi ngeela meeji ne pàmwāpa ki cidi cyënza ne cyôci eci cyënzekè... Mpindyewu, nudi bamanyè's, misangu yābūngi tutu tudyāmbidila ne mbibi be bwalu bintu kampanda bidi byënzeka, kadi, nudi bamanyè's, aci's ncifwānyine kwikala Nzambi, nwamonu's, mwikāle ūnūsāka mu bintu ebi. Piikalābi ne, Yēyē ngudi mucyāmbè, Yēyē's ngwacyënza.

²⁰ Kūkaadi malòlò ndambu, bàābūngi bàā kunùdi, anu bu ngondo mujimā nanku kumpala kwa mēmè kuya mu Afrike, pàmwāpa bàābūngi bàā kunùdi bàdi ne mukaba wa mēyi awu, bàā ku nwēnù bàdi ne mikaba ya mēyi, pa, *Disungula Dya Mukāji Wa Kusēla*, uvwa muyiishibwe mu Californie awu. Ndambu wa tusunsa twa ndekeelu twa mukaba awu, ncyēna mvūlukakū ne mvwamū to. Kadi Nyuma wa Mukalenge ūvwa mubwele mu mushindu wā dikema's. Mwawa mbāpiisha bwa mushindu wa nsōmbelu wūvwābo nendè ne bivwābo bēnza, ne paanyima pāā Evanjeeliyo mumane kuyiishibwa ne mwambiibwe bikole menemene kumpala kwabo. Pashiishe, dyakamwe, ki Nyuma Mwimpè kwakula ne kwamba ne: “Kaa-pènùmā,” nwamonu's, “wēwè cimenga cidi cidibikilā mu dīnā dya banjelo awu,” ki Los Angeles awu, “udi mubāndishibwe too ne mu Dyulu, kadi neūpwekeshibwè too ne mu iferno.” Nwamonu anyi? Ne pashiishe paanyima pāā kumane kujika, mona's, mwawa nsanganyiibwa pambelu, ne Mwaneetu Mosley ne Billy biikāle naanyī. Nenku kwambabo... Bōbō kwalukila e kutāngila, ne panshi pōnsō apu pāvwa pūle tente ne bantu balāāle, bambi munkaci mwa kudila myadi.

²¹ Ki mēmè kuya e kwangata Mufundu awu. Mēmè kwamba ne: “Kūdi cintu cyāmba bwa bwalu abu mu Bible.”

Nenku Yesu nguvwa utāndisha Kaa-pènùmā, bimenga byōnsò bya kumpenga kwa mbū bivwāye mukūmbūle abi. Mona's, kwambaYe ne: “Kaa-pènùmā, wēwè udi mubāndishibwe too ne mu Dyulu awu, neūpwekeshibwè too ne mu iferno.” KwambaYe ne: “Bwalu bu ne byenzedi bidī byenjībwe mwebe ebi bivwa byenjībwe mu Sodomā ne Gomōlā, nunku's bōbō mbashāāle too ne leelu ewu.” Ne mwine musangu awu, Sodomā ne Gomōlā bivwa bisanganyiibwa mwinshi mwa mbū.

Nenku anu paanyima pāā cyôci aci, pàmwāpa mpaanyima pāā bidimu bu lukama nanku, paanyima pāā ciprofeta cya Yesu aci, Kaa-pènùmā, cimenga cimwepele cya kumpenga kwa mbū cīvwa ye mukūmbūle, dikanka dya buloba dyākacitūkija mu māyi a mbū. Ne nwēnù's nudi bamanyè ne aci ki cīvwa dyandamuna dya buludi kūdi Californie, kūdi Los Angeles.

²² Ne pashiishe mu Tucson dituku adi, ndi mwenze anu ngaalukila, dikanka dinene dya buloba kwenzekadi kuntwaku. Ne beena maalū a mamanya bāvwa ku télévisiōn munkaci mwa kucizōla. Cīvwa mu bikāndākāndā. Bām̄ba ne, buloba, dituku

adi, mbwelè mutanta kuumukila anu ku Îles Aléoutiennes, anyi kuumukila ku Alaska, mu nyungulukilu wa Îles Aléoutiennes, ntàntà wa wipacila kilòmèètà nkama yisatu ne makumi abidi mu mbû, mwalùkile ku San Diego, munyùngùlùke Los Angeles, ne mupàtùkile ku San Diego. Nenku mmubaaluluke centimètres yàbùngì. Nzubu mmyupuke. Nzubu ya bilààla-beenyi mmitùkìne.

Ki bàvwà mu muiiki wa ku tudyòmbà abu kwelabo—kwelabo beena maalu a mamanya lukonko. Kwambabo ne: “Ee, aci’s ncifwànyìne kutùkina òngà dituku’s?”

²³ Awu kwambaye ne: “Cifwànyìne? Necitukinè!” Ki kwambaye ménà a mu maalu a mamanya a mùdì musàbusabu wà mu buloba awu. . . Wòwò awu ki wùdì mwenzèje dikanka dya buloba edi too ne kwònsò aku, mu nyungulukilu wa San Diego too ne mwinshi amu. Cikaadi mwaba wà cyondòkòndòkò awu. Kadi patùdì twakulangana apa cyònsò aci cikaadi cibangè kupandika, cyenzè bu lusenga lwikàle lùdìshika, kadi mpindyewu cikaadi anu cizubuzubu. Ne cikaadi cibaalùlùke, centimètres yàbùngì. Bàvwà mwa kwangata tulòndò twa mpolondo ne bikwabo, ne kwenda kulondesha mutanta awu, ne kwenzapù bimanyinu, ne kumona kùkaavwàwu.

Ne wùkaadi mubaalùlùke, centimètres yàbùngì kabidi, pàmwàpa centimètres yitaanu anyi mwandamukulu, dituku adi, anu páfumu ciprofeta aci ku difidiibwa.

Nenku aba bàvwà bèèla beena maalu a mamanya nkonko abu, kwambabo ne: “Ee, pàmwàpa kacýàkwenzeka mu cikondo cyetu twètù eci to.”

²⁴ Awu kwambaye ne: “Ncifwànyìne kwenzeka mu tusunsa tutaanu anyi mu bidimu bitaanu; kadi necidìshikè.”

²⁵ Mandamu Simpson, ncyèna ngeela meeji ne yêyè ùdi neetu leelu ewu to. Anyi, ndi mmona Mwaneetu Fred musòmbe kaaba aka, kadi ncyèna mumanye ne Mandamu Simpson udi penyi to. Yêyè úwua muye kangata ciprofeta címvwà mufile, bu mu cidimu cya 1935 nanku awu anyi cintu bu nanku, nenku cyàmba ne: “Cikondo necilwe,” ncifùnda mu mukanda mwaba kampanda, “cìikalà mbû mwa kabwela too ne mu cipeela.”

Tàngilàayi numone cìikalà mwa kwenzeka. Bu binunu bya kilòmèètà bivudija ku binunu bya kilòmèètà abi bwa kutùkina mu musàbusabu wà mu buloba awu, ne kusenunukamù, nekùfwe bantu miliyò musangu wumwe. Ne ciine aci’s necyènzejè divwala dya màyi a mbû! Vùlukàayi ne, too ne ku Mbû wa Salton kwàka, buloba mbupweke ne mêtres makumi asatu anyi makumi asambombo kutàmba kwinshi kwa mbû. Pàmwàpa màyi awu neàlwe too ne pabwìpi ne Tucson, ne divwala dya màyi a mbû dyàpìcilàmu adi. “Ne mbû neàkabwelè too ne mu cipeela.”

Matunga àkaadi àpanduluka, Izaleela nyewu
 ùtabuluka,
 Bimanyinu byàkadyànjlà baprofeta beetu
 kwamba;
 Matuku a bàà Bisàmbà bya bendè mmabala,
 mûle tente ne bintu bidì bîkwàcishà bwôwà;
 “Alùkilaayi, Éyì nwènù bàdì batàngalàjiibwe,
 kùdì beenu.”

²⁶ Tudi mu cikondo cya nshiikidilu. Mpindyewu, Mukalenge ànùbènèshèku mu mushindu mubanjike. Ndi nditwa mu dibyàkula mpwà mwoyi dîbà. Netùjiminè lukasa, ne lukasa lwònsò, tubwela mu Cyendeleele, nansha bya munyi.

²⁷ Nenku mpindyewu mu Maakò Munsantu, nshapita wa 7 ku mvensa wa 7, bwa kufilakù dyumvwija ku cyena-bwalu civwà cibadiibwe mu Kulondolola wa Kumpala 13 amu. Bwa kupetakù dyumvwija ku cyôci eci, ndi muswe Maakò 7.7.

...bàdì bànkukwila mu cijengu, bàlongeshangana
 mēyì matùma a bantu bu ne ki dilongesha.

²⁸ Mpindyewu, mēmè ncyênàku ne cîndi mumanye to pa kuumusha anu Mukenji wùdì Mukalenge mumpèèshe, ne ki cyònsò cîndiku mwa kwakulapù. Nenku mpindyewu, ndi muswe kwakula pa cyena-bwalu mu dînda emu cîndi mēmè mwele meeji ne neciikalè cîmpè. Nenku dilòlò edi ndi muswe kwakula pa ne, “cyakudya mu muvù wàci,” bu Mukalenge mwa kwanyisha: *Cyàkudyà Cyà Nyumà Mu Muvù Wàci*, ne mushindu wà kuCipeta. Mpindyewu, mu dînda emu: *Kuteeta Bwà Kwenzela Nzambi Mudimu Kaciyi Diswa Dyà Nzambi*.

²⁹ Nzambi mmudishikàmine. Ne tudi tumona kaaba aka cyàkenzà Davidi, mu kubala kwa Mufundù wà Kulondolola wa Kumpala 13. Ne yêyè ùvwa...Meeji èndè àvwa mîmpè. Kadi Nzambi kêna ùtùpèèsha dikumbanyina bwa meeji mîmpè to. Kùdì mushindu anu wumwepele bwa kukwàcila Nzambi mudimu, mmu kwenza kwa diswa Dyèndè ku díyì Dyèndè ditùma. Nenku Nzambi, mwikàle mudishikàmine, kakwèna muntu nansha umwe bwa kuMwambila cya dyenza anyi mwa kucyènzà to. Yêyè ùdì ùcyènzà mu mushindu, wùdìYe mmumanye ne mmushindu mujaalàme wa kucyenza. Ne aci cidi cyènzà ne ndyũmvwèku bîmpè. Ne bìvwa bikèngela bwa kwenzaci ne twètù bònsò tùdyũmvwè bîmpè, ne ndi mutwishiiibwe ne ki mùdici cyènzà. Bwalu, muntu mmufwànyine kuswa bwa kulwaCi munshindu *kampanda*, ne mukwabo muswe bwa kuyaCi mushindu *kansanga*, ne mukwabo mushindu mukwabo.

³⁰ Kadi cintu cimwepele cya cinène, kabidi, pa bidì bitàngilà Nzambi ncyà ne, Yêyè, mpindyewu, kàtu mutùshiyekù katùyi bamanyè cidi Bulelela ne mwa kucyènzà to. Yêyè kî mmufwànyine kwikala mwakane to, mu kutùnyooka bwa

dyenza cintu citùdi katùyi bamanye mùvwàci mwa kwenjiibwa, ne pashiishe kutùshiya tutànkakana tukadyèla mu cintu kampanda. Yèyè kèna Nzambi wa mushindu awu nansha. Yèyè ùdi Nzambi wa wàmba Dîyì ne ùtèkemena ne bânà Bèndè nebàDitàbùùjè. Nenku, ki bwa cinyi, Yèyè mmumanye cidi citàmbe bwimpè, ne dîbà dya kucyènza, ne mwa kucyènza mwine. Twètù tutu ne yetu mmwènenu pa bwalu abu, kadi Yèyè ngudi mumanye.

³¹ Ne pashiishe Yèyè mutèèke ndongolwelu kampanda, wíkalaYe mwa kwenza, kadi kàyi mutwāmbile cìvwā mwa kwenzeka ne mùvwāci mwa kwenzeka, dîbà adi twètù, mu kulendukilapu, tudì bafwānyine—bafwānyine kubingishiibwa mu—mu kulendukilapu kwetu aku; anyi, mu kuteeta bwa kwenza cintu kampanda, muntu yònsò mmufwānyine kubingishiibwa. Kadi kùdi njila anu umwepele, ne mwine awu n'Dîyì Dyèndè.

³² Ne cìkwabo cintu, Davidi mwaba ewu, tudì tumona ne mu mwoyi wèndè yèyè ùvwa muswe kwenza cintu cìvwā cimpè. Kāvwa ne kabingilā kabi nansha kamwe, anyi kiipācila kabi to. Kadi, nzubu, anyi mushèètè wā cipungidi wā Mukalenge, wùvwa kule ne—ne cisāmbā, nenku yèyè ùvwa muswe kwaluja mushèètè wā cipungidi wā Nzambi mu mwaba wāvū, bwa bantu kwikalabo bākonka Nzambi pa bidì bitāngilā maalū āvwābo baswè.

³³ Pamutu pāà—pāà kulekela anu bwalu abu nanku, twètù. . . Ambāāyibi tūng bu ne Mwaneetu Blair ne tatwèndè wa mwānā mukese wa balume awu bambe ne: “Ee, ndyakabi’s, mwānā’s wāmānyì anu kutāpika, wāmānyì kufwa. ngeela meeji ne, cidi anu ncintu cyenzèke pāāci nanku’s”? Kadi bōbō bāākaya lubilu kùdi Nzambi.

³⁴ Ambāāyibi tūng bu ne inābānzā mutekete awu, ne bāyèndè, mwambi mujimā wa Evanjeeliyo, kùkaavwa malòlò ndambu, anyi matuku, pāvwa inābānzā mutekete awu muzaajike mwongo apu, yèyè udi ufūma ku dijuukila kuulu ewu. . . Ngangabuka ùvwa mwambe ne: “Yèyè neāshaalè mucibùkile panshi matuku èndè ónsò a mwoyi.” Ambāāyibi tūng bu ne yèyè ne bāyèndè bāvwa bambe ne: “Ee, munanga wānyì, netwikalè anu tusāmbangana pèètù bwa cyōci aci’s”? Kadi bōbō ne lukasa lwōnsò bāākenza cintu kampanda pa bwalu abu; bāākaya kùdi Nzambi. Bintu būngibi mu Bible emu bitùdi bafwānyine kuleedila’s wè, bya mùdi bantu bāpeta lutatu, bāya kùdi Nzambi!

³⁵ Ee, musangu awu, mu matuku awu, bāvwa ne mwaba wā ditwīlangana anu wumwepele mùvwābo mwa kutwīlangana ne Nzambi, ne kùvwa nku mushèètè wā cipungidi, mwinshi mwa mashi. Ki cìcìdi kabidi mwaba wumwepele wa kutwīlangana, mwinshi mwa Mashi. Nkwasa wa ngāsā bāvwa bāmyaminapù

mashi, bwa kufwila mukuukwidi luse, anyi mulombi, pàvwàye ùlwa bwa kwenza dilomba kùdì Nzambi. Kadi Nzambi ùvwa ne mushingà wà pabwàwù, njila uvwa ukèngela bwa wèwè kulonda, wèwè pèèbè, bwa bwalu abu, ne Yèyè kàvwa mufwànyinekù kwitaba nî ncinyi nî ncinyi cikwabo cyònsò nansha. Yèyè kàvwa mufwànyinekù kwitaba cikwabo cintu cidyànjila kulongolola to; anu njila udiYè Yèyè mulongolole awu.

³⁶ Anu matuku makese aa ndi mufùme ku diyiisha Diyiisha kampanda, bààbùngì bàà kunùdì mbaDìmanyè, dya ne, mwaba anu wumwepele mulongola wùdì Nzambi ùtwilangana ne mukuukwidi, mwaba wàkambàYe ne: “Nénteekèlè Dìnà Dyànyì.” Bu twètù mwa kusanganakù ekeleeziya mùdìYe mutèèke Dìnà Dyèndè, dībà adi’s twàpecì wòwò mwaba awu. Yèyè mmwambe ne: “Ncyàkukubèneshila mu biibi byònsò to; anu mu biibi bìndì mutèèkele Dìnà Dyànyì. Nènditèèkè mu mwaba wumwepele, ne bìdì bìkèngela bwa wèwè kusambakeena Naanyì mwômò amu; nenku ki mwaba wumwepele wùNgààsambakeenà neebe.” Nenku twàsangànyì ne, mwômò amu, mùdìYe mutèèke Dìnà Dyèndè amu, ki mwaba wumwepele wùdìYe ùsambakeena ne mukuukwidi. Ne Dìnà Dyèndè òvwa n’Yesu Kilisto. Dìnà dya Nzambi n’Yesu Kilisto.

³⁷ Yesu wàkamba ne: “Mémè ndi mulwe mu Dìnà dya Taatù Wanyì.” Mwànà wa balume yònsò ewu udi ulwa mu dìnà dya tatwèndè. Ne Yèyè wàkalwa mu Dìnà dya Taatù.

“Ne kakwèna dīngà Dìnà nansha dimwe mwinshi mwa Dyulu dipà bantu to,” nansha bàdìbìikila ne m’Méthodiste, Baptiste, Presbytérien, église de Christ, cyònsò cìdìdì difwànyìne kwikala aci. Kùdì mwaba wa ditwilanganana anu wumwepele mùdì Nzambi ùtwilangana ne muntu, ne mwine awu mpàdiye mu Yesu Kilisto, mwaba wumwepele. Nenku bintu byònsò bya kale bya mu Dipungila Dikulukulu ebi, bìvwa cifwànyikijilu cya cyòcì aci. Ndi muswe bwa nwènù kucyùmva bitòòke tòò. Mpindyewu, ndileesona dya kalaasa kàà Dyalumingu. Ndi ne Mifùndù ne tuntu tufùnda mwab’ewu. Mwva mwele meeji ne eci cìvwakù mwa kunwàmbulwisha bwa kumvwa, bu mùdìbì ne bintu byònsò bya kale abi mbyenzeke bu bileejilu kutùdì.

³⁸ Mpindyewu, tudi tusangana ne Nzambi ùvwa ne mushindu kampanda wà dyenza bintu. Kadi Davidì, anu mubènèshìibwe kùdì Nzambi, mùvwàye mubènèshìibwe amu, ne mulwe mfumu, ki kumbà kudyàmbidilayè anu ne ùvwa anu mwa kwenza cintu kampanda bwa Nzambi, nansha bya munyì. Kadi kààkacyènzakù mu mushindu mujaalàme to.

³⁹ Tudi tumona ne, Nzambi ùtu ùbuulula Dìyì Dyèndè mu muvù Wèndè Yèyè mwine mudyànjila kulongolola. Mpindyewu, mmunyì mùvwà Martin Luther mwa kumanya Mukenji wa leelu ewu? Mmunyì mùvwà ba-Presbytériens mwa kumanya? Mmunyì mùvwà Martin...anyì ekeleeziya wa Katolike mwa

kumanya mukenji wà Martin Luther? Mmunyi mùvwà John Wesley mwa kwikala muumanye mukenji wà Luther? Mmunyi mùvwà Wesley mwa kwikala mumanye mukenji wà beena Mpenta? Anyi mmunyi mùvwà beena Mpenta mwa kumanya Mukenji ewu? Nwamonu anyi? Yèyè ùdi ùWùbuulula mu mivù Yèndè, bwalu Wùdi n'Dimiinu. Nenku pàdiCi cìkola ne cìboba, Yèyè ùDìbuulula.

⁴⁰ Bu mùdi luuya lwa dībà dya muulu, bwa kukangula. Pàdi dimiinu ditekète ne dyànà, lùdi lùdìpàtula mu buloba, dimiinu adi; pashìishe lùdìpèèsha mabeji ààdi, mu citùpà cìkwabo cya dībà dya muulu. Dībà dya muulu dya luuya lukole didi mwa kudishebèya pìikalàdi dimiinu dya dīboba. . . anyi cikondo cya dīboba. Pa nanku, Yèyè ùdi ùkòntonona dība dya mulu ne ùkòntonona bufùki, bwa kukumbananganabi ne Dīyi Dyèndè.

Yèyè ùdi ùkòntonona Ekeleeziya, badyànjila-kulongolola abu, Mukaji-musela, bwa kukumbananganabò ne muvù wùdìbo ne mwoyi awu.

⁴¹ Nansha bufùki bwine's bùdi bùtwàmbila leelu ewu, patùdi tumona matunga àpanduluka apa, buloba bùtùkina ne, mufundu wùdi ku cimanu. Tudi tumona ekeleeziya ne ngiikàdìlù yìdiye ùsanganyibwamù.

Tudi tumona Mukaji-musela ne ngiikàdìlù udiYè ùsanganyibwamù. Ne tudi tumanya, tumanyina ku bufùki ne, Ekeleeziya ùdi munkaci mwa kudilongolola bwa kuumuka. Cikondo kaayi cya butumbi's wè! Ncikondo cìvwà baprofeta bònsò bajingèjinge kumona, dībà edi.

⁴² Mpindyewu, Yèyè ùdi ùbuulula Dīyi Dyèndè anu mu muvù wàDì. Martin Luther ùvwa ùbala Bible umwèumwè utùdi twètù babalè ewu. Wesley ùvwa ùbala Bible umwèumwè uvwa Martin Luther mubale awu. Beena Mpenda bàvwa bàbala Bible umwèumwè utùdi twètù tubala ewu. Yesu ùvwa ùbala Bible umwèumwè uvwa Bàfaalèsà bàbala awu, kadi bóbò bàvwa ne. . . Bàvwa bàteeta bwa kulama blé mu citùpà cya ntwadijilu, pèndè munkaci mwa kuboba, bàpanga kumona dyabo dībà.

Mpindyewu Davìdi mmwenze cintu cimwecimwe aci mwaba ewu.

⁴³ Nzambi ùdi ùbuulula Dīyi edi mu muvù, ne ùbuulwila ewu udiYè ùsungula bwa kuDìbuulwila awu. Nzambi ngudi usungula ewu udiYè ùDìbuulwila. Yèyè wàkasungula aci kumpala kwa difùkà dya dyulu ne buloba. Byenzedi Byèndè byònsò bikaavwa bidyànjila kumanya kùdiYe, bisokoka muntu. Yèyè ùdi ùbibuulula mùdiYe Yèyè muswe. Mmuvù Wèndè musungula, muntu Wèndè musungula. Ne Yèyè kacya kàtukù mwanji kusungula kasùmbù kàà bantu anyi kasùmbù kàà ntendeleelu to; mmuntu musungula, ki mushindu wùdiYe ùcyènza.

⁴⁴ Nganyi wàpeta dikàmàkàmà dya kuMulongolola, ne kwamba ne: "Mpindyewu, Mukalenge, Udi mutupakane

pa kutèèka *ewu* muntu mu mudimu wà bwambi. *Ewu* muntu kèna wítabuuja mutùdi twètù twítabuuja to”? Nganyì wâmbila Nzambi ne mMutupakane mu cyôci aci? Mbifwànyine kukèngela muntu wa mumpicilekù mèmè ewu ku dipanga, bwa kuMwambilaye nanku. Yèyè's mmumanye cidiYe wènza. Yèyè mmumanye wa kusungula ne wa kubenga kusungula, cya dyenza ne dîbà dya kucyenza. Nansha twètù twela meeji bishi ne muntu kampanda ngudi mukùmbànyine bwa kwenza mudimu kampanda, Nzambi Yèyè ngudi mumanye ne nganyì udi mukùmbànyine bwa cikondo aci ne muvù awu, anyì cikondo ne dîba dikùmbàne bwa kucyenza.

⁴⁵ Nenku mwena Kilisto wa cya bushuwa, mulelela; mwena kwitabuuja wa cya bushuwa, mulelela mu Nzambi, ùdi wîndila Mukalenge bwa kwenza bintu ebi. Ikàlà windila mudimu wèbe wà bwambi. Wèwè muumvwe dibîikila, ikàlà mutwîshîibwe ne n'Nzambi. Ikàlà mutwîshîibwe ne dibîikila adi ndya cya bushuwa. Ikàlà mutwîshîibwe ne dîdi pa dîbà bwa cyûdi wamba aci. Bible mmwambe ne: “Aba bàdi bindîlà Mukalenge nebâvwîjululè makàndà àbò mapyamàpyà. Nebàbande muulu ne mapwapwa bu mukanku. Nebànyeemè lubilu kabàyi bàcyòka. Bòbò bendè lwà makàsà, kabààkupangila to.”

⁴⁶ Monaayi Davìdi, mfumu wa Izaleela, ucìvwa ufùminakù ku dyediibwa dya maanyi awu. Samwèlè ngwákamupòngolwela maanyi, ne yèyè ùvwa musungula kùdi Nzambi, bwa kwikalaye mfumu wa Izaleela. Nenku Davìdi kupetaye dibuulula edi, bwa kufikisha mushèètè wà cipungidi wà Mukalenge mu nsesa ya Davìdi. Mpindyewu, kakwèna cintu cibi nansha cimwe to, kadi, nudi numona's, Davìdi wàkacyènza mu mushindu mubi.

⁴⁷ Mpindyewu, bìdi bîmwèka bu ne bu muntu wa mushindu awu mwa kupeta dibuulula, muntu munene mùdi mfumu musungula wa Nzambi, mfumu mutàmbe bunene ukààdikù ne mwoyi pa buloba, pa kuumusha Kilisto, ngeela meeji ne, ùvwa n'Davìdi, bwalu Kilisto m'Mwànà wa Davìdi. Mpindyewu, muntu wa mutàmbe bunene awu, ùcìfùminakù ku dyediibwa dya maanyi, ùfùmina mu Bwikadi mene bwa Nzambi, wàkapeta dibuulula bwa kwenzaye cintu kampanda bwa Nzambi, ne muswe bwa kucyenza bwa Nzambi; kadi dibuulula adi diikàle dya mashimi. Mpindyewu, aci's ncintu cinène. Necipetanganè ne cyena-bwalu cyetu eci ne: *Kuteeta Kwenzela Nzambi Mudimu Kùyi Mubiikidibwe Bwà Kuwènza*.

⁴⁸ Monaayi ne, Davìdi ngwàkapeta dibuulula adi. Ne monaayi ne, kàvwa mmuprofeta, Natànaèlà, wàkapeta dibuulula adi to. Ùvwa n'Davìdi, mfumu, wàkapeta dibuulula adi. Nansha Natànaèlà kààkakonkiibwakù bwa bwalu abu to. Yèyè kààkakonkakù Natànaèlà to. Kadi nukààvwakù bamòne kaaba aka, mu Kulondolola wa Kumpala emu ne, yèyè wàkakonka baakàpìteenà bàà binunu, ne baakàpìteenà bàà nkama anyi? Yèyè kààkakonkakù Natànaèlà to. Wàkakonka bantu, ne

wàkakonka kabidi bààkwidi ne beena tèòlòjì bàà mu dituku adi, bafùndi ne beena tèòlòjì. Davidi wàkakonka dyambedi, wàmba ne: “Byôbì ne, cyôcì eci, pìikalàci cya kùdì Nzambi, tùyaayi tùkangàtè mushèètè wà cipungidi wà Nzambi wetu tulwe naawu, mu nsesa emu, nenku twikalàayi tukonka Nzambi kumpala kwa twètù kwenza maalu.”

⁴⁹ Kadi bàtu bambe, bwa mu matuku a Shawùlà ne: “Bààkiimanyika kukonka Nzambi, ku—ku—ku mushèètè wà cipungidi, Ulimà, Ulimà Tuumimà. Bààkiimanyika kwenza nanku.”

Davidi kwambaye ne: “Mpindyewu twàlukilàayi kùdì Nzambi, twètù bònsò! Twàlukilàayi ku cintu cijaalàme. Tùyaayi tùkangàtè mushèètè wa cipungidi tulwe naawu muneemu, tùlwayi ne Bwikadi bwa Nzambi,” mu ngaakwilu mukwabo’s, “mu nsesa emu. Twéñzàayi ditàbuluja. Twàlujàayi bantu.” Kadi yèyè wàkapeta dibuulula, òwà dimwèke ne ndimpè, kadi kacivwa diswa dya Nzambi to.

⁵⁰ Pamutu pàà kukonka mushimi wùvwàbì bikèngela bwa kwikalaye mukonke, yèyè kukonka baakàpìteenà bèndè, bwalu ùcivwa ùfùminakù ku diikala mfumu. Ki kulondaye ngeelèlù wa meeji awu, wa ne, baakàpìteenà bèndè banène ne bantu bèndè banene abu.

⁵¹ Pashìishe kubwelaye mu ekeleeziya wa kù dìnà awu ne kukonkaye ní bàvwakù mwa kwenza ditàbuluja. Baakwidi, bafùndi, baakàpìteenà bàà binunu, baakàpìteenà bàà nkama, ki kubàkonkaye. “Bwalu ebu ndiswa dya Mukalenge anyi?” Ki bòbò kwamba ne ndyòdì. Kadi, nudi numona’s, wàkapanga kukonka nsùlù munene ùtu Nzambi misangu yonso ùkwata nendè mudimu awu. Nwamonu’s, wàkapanga kucipeta.

⁵² Kadi meeji ènde àvwa mimpè. Kabingilà kèndè kàvwa kimpè. Kiipàcìlà kèndè kàvwa kimpè, kàà kutwala ditàbuluja mu nsesa, kwaluja bantu kùdì Nzambi aku, kadi kààkakonkaku mushindu wùvwà Nzambi mumwambile bwa kucyènzà to, nwamonu’s, nansha bantu bònsò mene bààkiitaba, ne baakwidi bwa ne mfumu ùvwa mubinge: Bàvwa ne dijinga dya mushèètè wa cipungidi kwalukilawu mu nsesa; mpindyewu, bàvwa dijinga ne Bwikadi bwa Nzambi; bàvwa dijinga ne ditàbuluja.

⁵³ Kadi Nzambi kàvwakù mulaye bwa kubuulula Dîyì Dyèndè, mu movù wàDì, kùdì bantu to. Kacya Yèyè kàvwakù mulaye bwa kuDìbuulwila mfumu, mu movù to. Nzambi kàtu ùshintuluka to, nansha kakese. Kàvwa mulaye bwa kwenza nanku to.

⁵⁴ Nansha wèwè ne meeji matòòke a bishi, ne tubingilà twimpè twa bishi, ne twipàcìlà twimpè twa bishi, ne mushindu wùdì bantu baswe bintu abi ne bamònè dijinga dyàbì, kùdì diswa dya Nzambi dìdì dikèngela kukumbaja mu byòbì bintu ebi. Ki cìndì muswe kutuutapù musonso bikole, bwalu ndi muswe kuwija cyôcì eci mu mushindu wa bikèngela wèwè kucimòna pìikalàbì

ne—piikalàbi ne Nyuma wa Nzambi mmusòmbèle munda mwebe amu. Ne ki bwa cinyi ndi njàngulukila ntàntà mule kaaba aka. Kî mbwà kunwàngata dîbà dyenu nwênù bàdì bàtèèlejila ku telefone, ne ku nshinga abu to, kadi ndi—ndi muswe nùcyûmvwè. Dîbà dyûdi mufucile dyôdi dijikè, dîbà adi angàta mukaba wà mêyi. Bwa ne kudi. . .

⁵⁵ Nansha byôbi ne bàdì naaci dijinga dyàbûngì, nansha mùdi bantu bônso biitaba ne bàdì naaci dijinga, nansha mùdici Bulelela, nansha nanku kùdi cintu cimwe cya kujandula. Ndiswa dya Nzambi anyi?

Mpindyewu, kacyapù Nzambi kàvwakù mulaye ne Neàbuulwile bamfumu Bèndè maalù Èndè masokome, ne Neàbuulwilè bantu Bèndè maalù Èndè masokòme to.

⁵⁶ Cintu cyenzè bu cya mu cikondo cya Miikà, mwânà wa Imlah. Patùdi tushiya, kî ntushiya dyumvwija to, kadi ncikondo cikwabo, bwa kutwala cyôci eci ne kunùvwijilaci cilelela, cya dya bushuwa kunùdi, bwa kacikadi cyàlwa kunùpita to.

⁵⁷ Kùvwa, mu matuku a Miikà. . . Yèyè ùvwa mupele, ne kabidi mupàtùkile mu dîkù dya bapele. Kadi, Aakàbà, mfumu wa Izaleela, bu ditunga mu bukookeshi bwa Nzambi, ùvwa mutèèke cilongelu ku luseke ne mujuule baprofeta basòbola ku cyanza cyèndè, badisungwila, ne ùvwa naabo nkama yinaayi mijimà mu cilongelu kampana. Ne bôbò abu bàvwa bantu banene. Kabàvwa baprofeta bàà mashimi to. Bàvwa baprofeta bàà beena Ebèlù, bantu bashùwashùwàlè. Ne bàvwa bàkonkela Nzambi maalù ku bôbò bantu abu. Ne cya bushuwa bôbò bàvwa bàmba biprofeta. Kadi, nudi numona's, pàakalwà diteetangana dya makàndà dya cya bushuwa, bàvwa muntu ne muntu pambelu pàà Dîyi ne diswa dya Nzambi. [Katùpà kàà mukaba wà mêyi munda mutupu—Muf.]

⁵⁸ Bwalu Yèhoshàfàtà wàkafùma ku Yèlùsàlèma bwa kutwilangana ne—ne mfumu Aakàbà, ki kuvwàlabò bivwàlù byabo, ne kusòmbabò mu mushiku wà mbelu wa ciibi, ne kubiiikidishabò baprofeta abu kumpala kwabo aku. Dyambedi, Aakàbà kwambaye ne: “Tudi ne mwaba mu Laamòtā-giilādā emu udi cya bushuwa wetù twètù.” Mpindyewu, aci ng'EMU MMUDÌ MUKALENGE WÀMBA. Yoshùwà ngwàkaabanyina bantu buloba abu ne kubàpèèshayèbu, kadi beena Pelèshètè kubùnyèngabò.

Ki yèyè ne: “Mwab'ewu bàna beetu twètù balela bàkèngela byakudya, kadi twètù katùyì ne buloba bukùmbàne bwa kukùnamù byakudya to. Kadi mwena lukunà wetù, beena Pelèshètè abu, mbàdì bàdiisha bààbò bàna balela, bampàngaanù abu, ne bya mu buloba bwine bùdi Yehowah Nzambi mutùpèèshe abu.” Aci's ncyà buludi menemene. Ki yèyè ne: “Mona, twètù aba, cisàmbà cya Nzambi, basòmbè mwaba ewu ne beetu bàna, mu lukengelu's, pàdi beena lukunà beetu bàdiisha bààbò

bânà mu buloba bùvwà Nzambi mutùpât-wile mu Èjiipitù bwa kutùpèeshabù abu.” Aci’s ncifwànyine kubindulula mwena téolòjì, kí mmwómò anyi? Yèyè ne: “Netùye bwa kangata malaba àdì Nzambi mutùpèeshè awu anyi?”

⁵⁹ Yèhoshàfàtà kwambaye ne: “Eyowa’s, mèmè nènkwambulwìshè. Twètù’s tudi bânà bàà muntu. Wèwè udi mu Yudaàya, ne mèmè ndi mu—mèmè ndi mu Yelusàlèma.” Anyi—anyi, civwa ncyanza mwandamuna anyi? Ngeela meeji. . . To, ncyà bushuwa. Ngeela meeji ne cìdì. . . Yèhoshàfàtà’s.

Nansha nanku, Yèhoshàfàtà ùvwa muntu mwímpè, mfumu, muntu mwakane uvwa munange Mukalenge. Aakàbà ùvwa mwena kwitabuuja wa civùmvù. Kì kubàbìikidishabò mwaba awu, nenku Yèhoshàfàtà kwambaye ne: “Tèelejà, twànji tükonkèbi Mukalenge dyambedi. S’bìvwa bikèngela bwa twètù kwanji kujandula pa bwalu ebu.” Nwamonu’s, Davidi wikalapù nanshà mwenze cyàkenzà Yèhoshàfàtà aci’s! Yèyè ne: “Kabivwakù bikèngela bwa twètù kwenza nanku anyi?”

Ne lukasa lwònsò, bu mùvwàye mwena Izaleela, Aakàbà kwambaye ne: “Cya bushuwa’s. Ndi ne nkama yinaayi mijimà ya beena Ebèlù, bu twètù, baprofeta beena Ebèlù bàà mu bulongolodi bwetu sungasunga. Nenku nèmbàkonkè bóbò. Mbaprofeta.” Mpindyewu, nudi numona’s, anu. . .

⁶⁰ Wèwè udi wamba ne: “Aci’s cìdì cìndendwisha mèmè’s, Mwaneetu Branham. Muprofeta?” Kaa, eyowa’s. Kùvwakù mukwabo mu cikondo cya Yelèmiyà, wákamba ne bàvwa mwa kwenza muntwamu anu bidimi bibidi cyanaàna. Mukalenge ùvwa mwambile Yelèmiyà ne, “makumi mwandamutekete.” Kudyèlayè cikòkedi ku nshingu, ne muprofeta awu kucikòsayè, Hànaaniyà. Kadi’s nudi bamanyè cyàkamwenzekelà. Kaa, eyowa’s. Bikèngela wèwè kushààla ne Dìyì.

Pa nanku baprofeta aba kulwabo mwaba awu ne kwambabo ciprofeta, bàmba ne: “Ndà! Mukalenge ùdi neebe.”

⁶¹ Ne umwe wa kùdìbo, ngeela meeji (dìna dyèndè nyewu dyàmpù mwoyi mpindyewu) mfùmwbò awu, Zedèkiyà, ngeela meeji, kwambaye, kutèekaye nsengu ya byamu yibidi mwaba awu ne kwambaye ne: “EMU MMÜDÌ MUKALENGÈ WÀMBA. Ku yôyi eyi,” mpindyewu muntu awu’s ùvwa ne meeji matòke, “neusakè mwena lukunà webè awu too ne mu malaba àbò, ne wèwè newàngatè cìdì cya Nzambi aci. Ncikupèèbwe.” Ncyèna ngeela meeji ne yèyè ùvwa mwena lubombo to. Ndi ngiitabuuja ne yèyè ùvwa muntu mwímpè: Ndi ngiitabuuja ne baprofeta bònsò abu ncìvwàbo.

⁶² Wèwè udi wamba ne: “Baprofeta?” Eyowa’s! Vùlukàayi ne, muntu mwine wàkìitaba bwa kushebeya Yesu Kilisto awu, yèyè’s wákamba ciprofeta, bwalu civwa mmudimu wùvwàye naawu. Yèyè ùvwa mwakwidi munene cidimu aci. Nenku bu mùvwàbi ne yèyè ùvwa ne mudimu awu, ne yèyè nguvwa mu mudimu awu,

Nyuma wa Nzambi's wàkalwa kùdiye. Aci kacivwa cyùmvwija ne yêyê ùvwa musùngidiibwe anyi nĩ ncinyi pa bwalu abu to. Nenku yêyê wàkamba ciprofeta: Kaayifà awu, bwalu mudimu wèndè awu ngwàkenzà aci.

⁶³ Nenku baprofeta aba, bu mùvwàbo baprofeta, ne mudimu wà buprofeta, s'baàkamba ciprofeta. Nenku Nyuma wa Nzambi wàkalwa pambidi pààbò, bantu biikàle ne mapà a Nyuma.

⁶⁴ Ndi mumanye ne bya pa lukama makumi citeema ne citeema bya bàndi munkaci mwa kwakula naabo mbeena Mpenta. Kadi bantu misangu yàbùngì, muntu, Nzambi ùdi mwa kukwata nendè mudimu, kumupèesha dipà kampanda, kadi bantu nebàbangè kucincimika bantu abu. Yêyê kàyi menemene mubiikidiibwe ne mutùmibwe kùdi Nzambi to, yêyê's neàfikishè mulume awu anyi mukaji awu ku dyamba dya cintu cidi kaciyi diswa dya Nzambi, bwalu bantu bàdi bàmwenzeja bwa kucyènzayè.

⁶⁵ Mushindu mwine wàkakèngelàbi bwa mèmè kulongololakù mpaasàtà wetu mukese ewu pa bwalu abu. Mu diitu mwàmwa mu dinda kampanda, bu pa dībà isatu wa mu dinda nanku awu, kwambaYe ne: “Ndà kambile Mwaneetu Neville!” Mèmè kulwa kùdi, ki mmwòmò anyi, Mwaneetu Neville?

⁶⁶ Ki bantu bònsò abu ne: “Mwaneetu Neville, ngenzèlèku ciprofeta. Ngambilèku *cikampanda* anyi *cikansanga*.” Nwamonu anyi? Nudi dībà adi numufikisha ku dyamba bintu bìdi bifwànyine kubenga kwenzeka.

“Aba bàdi bindilà,” bwa kujandula cidi Mukalenge muswe kwenza's. Nwamonu anyi?

⁶⁷ Pa nanku bantu aba bààkatàngila bwalu abu mu luseke lwà mubidi ne: “Buloba abu mbwetu twètù.” Kadi, nudi numona's, bóbò kabààkapeta Dìyi ne diswa dya Nzambi to.

⁶⁸ Pashìishe ki Miikà kudyataye mwaba awu, kadi ùvwa yêyê ne cikeena-kumona. Yêyê wàkanji kukenketa, dyambedi, nudi numona's. Kwambaye ne: “Indilaayi. Mpèèshaayi bufuku bumwepele. Ngànji njandule, ne pàmwápa mààlabà ndi mwa kunwàdamuna.” Kàvwa yêyê muye lukasalukasa ne: “EMU MMÙDÌ MUKALENGE WÀMBA” to, bu mùdi, kwitabangana ne baprofeta bakwabo abu. Yêyê wàkamba ne: “Mèmè nèngàmbè anu cidi Nzambi wàmba aci.”

Nenku pàkacyàbu, tudi tusangana ne, Nzambi wàkamwambila cívwa ne cya kwenzeka. Ne kakùyi mpatà to cívwa cibèngangana ne cya bakwabo abu. Cilogelu cijimà, cívwa cibèngàngàne. Ne umwe wa kùdibo mene wàkalwa tàmakàtàmàkà ne kumunàngulayè dipi mwísù, bwa cyôci aci. Kadi, nwamonu's, yêyê wàkindila. Dībà adi pààkenzàye nanku, wàkapàlakaja ciprofeta cyèndè aci, cikeena-kumoana cyèndè aci, ne Dìyi difùnda, ne cívwa cikùmbànàngàne anu ne Dìyi.

⁶⁹ Pàdì muntu wàmba mùdiye “mupete diibuulula dya kubàtiiza bantu mu Dìnà dya ‘Taatu, Mwànà, Nyuma Mwimpè,” aci’s cìdì cìbèngàngàne ne Dìyì. Muntu nansha umwe wa ku bakwabo bònsò abu kààkacyènzakù to. Pàdìbo bàmba, ne: “Kaa, netwimanè, ne *bikampanda*, *bikansanga*, ne *bikankenga*,” ne bikwabo byònsò, abi’s mbibèngàngàne ne Dìyì. Pàdìbo bàmba mùdìbo “kabàyi bìtabuuja dimiinu dya nyoka,” aci’s ncibèngàngàne ne Dìyì. Bintu bikwabo byònsò ebi, s’mbibèngàngàne ne Dìyì. Bidi ne cya kwikala pamwe ne Dìyì ne mu movù.

⁷⁰ Mpindyewu, Davidì wikalakù nanshà mwenze ciine aci’s. Mushèètè wà cipungidi wùvwa wùlwa, kadi kî mpa dîbà adi to; kakùvwakù mwaba bwàwù wòwò to.

⁷¹ Monaayi mpindyewu pààkayàbo bwa kwangata mushèètè wa cipungidi awu, bantu bònsò bàà myànzu mitùmbùke bàakamba ne: “Ki cintu cya dyenza ncyòcì aci, Davidì. Butumbi kùdì Nzambi! Bìdì bitùkèngela ditàbulu.” Aci’s cìvwa m’Mpenta wa cya bushuwa ewu, leelu ewu; ba-Baptistes, ba-Presbytériens. “Davidì, wèwè ki wetù mfumu! Nwènù bònsò...Kàpíteenà *Kampanda*, ne Major *Kampanda*, ne Kalàlà *Kampanda* kàà masalaayi, nebiikàlè mu disangisha dyebe amu. Mona’s, bàdì bàmba ne ki cintu cya dyenza ncyòcì aci, Davidì. Ditunga dijimà nditwe ku cyebe.”

Ki lutatu lùdiku leelu ndwòlò alu. Mémè cìndì muswe kî nditunga to. Ndi muswe Nzambi, nansha kakùyi muntu mukwabo udi mwa kwimana naanyi.

⁷² Davidì ùvwa ne baakàpíteenà bònsò. Ùvwa ne dimwela dya mu diboko dya basalaayi. Ùvwa ne dimwela dya mu diboko dya mangumba ònsò, pamwe ne beena tèlòlòjì bònsò, ne bònsò, bantu bònsò biitabàngàne nendè. Ki mùvwà kabidi Aakàbà, ne bakwabo mu Mifundù, kadi kàvwa ne Nzambi to, bwalu ùvwa mupàtùke mu diswa dya Nzambi. Ndi ntékemena ne tudi tuumvwa eci.

⁷³ Monaayi, kwenzabo cintu cyònsò cya butendeleedi cìvwàbo bafwànyine kwenza aci. Pàmwàpa bààkafila mamanyisha ne byònsò ne: “Ditàbulu dinene! Mushèètè wa cipungidi newàlujiibwè. Netwènzè ditàbulu. Netwènzè *bikampanda*.”

⁷⁴ Monaayi, kutumaye bimbi bàà misambu. Kutùmayè bantu biikàlè ne nkòmbè, ne mpungi, ne kwenzabo cintu cyònsò cya butendeleedi cìvwàbo pààbò bamanyè mwa kwenza aci; kadi Nzambi kàvwa ànumù to.

Mu mushindu kampanda tudi tucimòna munkaci mwa kwenzeka cyakabidi, kî mmwòmò anyi?

⁷⁵ Kwangatabo bimbi bàà misambu bònsò. Kwangatabo bimbi bàà nkòmbè, beedi bàà mpandalala; bakaji, balume, ne ewu yònsò uvwa wimba awu. Kuyabo naabo bònsò kuntwaku, ne kwenzàbo cyenzedi cyònsò cyà butendeleedi aci.

Ncyèna muswe kwamba eci to, kadi bikèngela anu ncyāmbè. Ki mùdì kabidi mangumba aa leelu ewu, a beena Mpenta ne bônso, bàdi bènza byenzedi byônso byà butendeleedi, byà dimba dyà misambu ne dyela dya mbila abi.

⁷⁶ Monaayi ne, Davidi wàkeela mbila ne bukole bwèndè bwônso, ne wàkeela mbila mikole, ne kutùpika, kwenza dinyungakana dyônso dya butendeleedi divwà difwānyine kwikalakù adi; kadi Nzambi kàvwa ànumù to. Kadi kabingilà kèndè, ne kiipàcilà kèndè, ne byônso bivwa bijaalāme; kadi ùvwa muye naabi mu mushindu mubi. Nwamonu anyi? Wakenza didikùpa dyônso dya butendeleedi adi; kwelāye mbila, kwimbaye misambu, kwangata bimbi bàà misambu bàà pabwàbù, beedi bàà mbila bàà pabwàbò, ne bikwabo byônso. Kujābo mu nyuma. Kwenzabo byônso bivwà bya butendeleedi abi.

⁷⁷ S'ncintu anu mùdì bibilù byetu bya butangadiki bya mu cikondo cyetu eci abi. Mbaswe kupetela Kilisto bantu bàà buloba bujimā. Cintu bu nanku kacitukù to. Matābuluja manene àdì ābooyā bantu bàà dibooya, bintu binène byēnzeka; bu nansha ne bāvwakù mwa kumanya, adi dituku's ndimane kupita. Ditunga ndyediibwe mulawu. Kadi ki kwasabo bitanda eku, bibilù bya butangadiki, malongolodi, ne byônso. Kadi, bipeta's bidi byamba kwikala anu mùvwà bya cikondo cya Davidi abi, kacyakakùmbana to.

⁷⁸ Tudi tuyā tukenza ditābuluja. Banene beetu, bamwe bàà ku batangadiki beetu bàà banene leelu, bàdi bāmba mùdìbo ne bantu binunu makumi asatu bādìbo bakùdìmwishe mucima, mu mbingu yisambombo; kadi cidimu cimwe pashìishe, dya bàalukila anyi, kabāyi mwa kusanganakù makumi asatu etu aa to. Kùdì cintu cidi kaciyi cyènda bimpè to. Bwalu bùdi ne, ncintu anu cimwecimwe ne cyākenzà Davidi aci. Bantu banene bàà myānzù, bantu banene, bayiishi banene, bilongelu bya bitāmbē bunene, bukookeshi bunene, kadi bācidi anu bākonka dingumba dya kale pamutu pāà kutangila Dīyi dya Nzambi mumpala bwa kumona dībā dīdì movù mwikālekù. Kwēna mwa kukūna byakudya kampanda kaciyi mu bikondo kampanda bya cidimu to.

⁷⁹ Mpindyewu tūmonāāyaaku cyākenzekà ne ncinyi. Nansha mùvwābi ne dyabo... Disaluka dyabo dya butendeleedi ne bikwabo bivwa binène, meeji ābò āvwa manene, cibilù cyabo cya butangadiki cīvwa cinène, ngimbilù wabò wa misambu ùvwa munene, njìilu wabò wa maja ùvwa wa njājāmā, ngeelèlù wabò wa mbila ùvwa munene, mùjikì wabò wùvwa munene, ne bāvwa ne mushèètè wà cipungidi. Mushèètè wà cipungidi wùdì ne mushinga kaayì kakùyì Nzambi? S'cidi anu cishèètèshèètè cya mabaya cyanāānā, ne bipese bibidi bya mabwe.

S'cidi anu bu kwangata kwa kòòmunyò, kwikala

mubàtìjìibwe. Kubàtìjìibwa kùdì ne musinga kaayi pawikalà kùyi munyingalàle dyambedi? Bidi ne musinga kaayi, bwa kwangata kòomunyò, kulwa mwena lubombo, pawikalà kùyi ne nsòmbelu mwine ne witabuuja bikwabo bya Dìyi dya Nzambi? Kwangata citùpà cyàDì, kadi kùyi wangata bikwabo byàDì, s'bidì bìleeja ne kùdì cintu kampanda cya kaciya cyènda bîmpè's.

⁸⁰ Mpindyewu, pàdì byònsò ebi byènzeka, tùmônààyaaku mpindyewu cìdì cyènzekà pàdì Nzambi, ne cikondo Cyèndè ne díbà Dyèndè, kàyikù mwangaciibwe ne musinga to; kadi anu meeji a bantu pa òwò.

⁸¹ Bantu bààbùngì bàkaadi bangambilàmbìle ne: “Bwa cinyi kwèna ulwakù muneemu bwa kwenza disangisha? Ee, twètù's mbàdì bàkubiikila. Twà cyàlà bwa *cikampanda*, *cikansanga*, ne *cikankenga*.”

Indilaayi! Nudi bafwànyìnè kucijinga, kadi cìdì Nzambi wàmba ncinyi pa bwalu abu? Bantu bààbùngì bàkaadi bangambilàmbìle... Nkàadi mupete dibìikila, nkàadi mupetèpète miyiiki ya babidi, miyiiki ya babidi ya muntu nkàayèndè ne bikwabo, bangidile cidimu cijimà. Indilaayi! Mmuniyì mûngààmányà cya kwamba pàdì Nzambi kàyi mungambile cya kwamba? Nwamonu's, bikèngela kwindila! Ki bwa cinyi ngàmbi ne: “Cìfùndaayi pa dibeji. Ngánjì mmone cìdìYe Yèyè mwambe.” Nwamonu anyi? Indilaayi! “Aba bàdì bindilà Mukalenge nebàvwijululè makàndà àbò mapyamàpyà.” Ncya bushuwa anyi?

⁸² Monaayi, bààkakonka anu baakwidi bàà mu dituku adi, beena tèlòlòjì, ne mangumba. Kadi monaayi, mu kwenza kwa nanku, kukonka kwa baakwidi ne kukonka kwa disangisha, kukonka kwa bantu, s' bààkacyènza mu mushindu mubì.

⁸³ Monaayi, mushèètè wà cipungidi awu wùwwa n'Dìyi. Tudi bamanyè ne aci ncya bushuwa. Bwalu, mushèètè wà cipungidi n'Kilisto, ne Kilisto n'Dìyi. Nwamonu anyi? Mushèètè wà cipungidi, anyi Dìyi, kawàkatèèkiibwa mu mwaba wàwù wà kumpala, mulongolola, wà ku cibangidilu to. Kaa, kanùpangidikù bwa kuumvwa eci to, nwènú ekeleeziya!

Byònsò bìvwà bipwàngàne, ne byònsò bìvwà ne mmwènekèlu anu mwìmpè, bu ditàbulu ja dinene òwà munkaci mwa kulwa; kadi anu bwalu bààkapanga kukonka muntu uwa ukèngediibwa bwa bwalu abu! Bòbò bààkakonka baakwidi, bààkakonka bantu banene bàà myànzu, bààkakonka beena tèlòlòjì, bààkakonka bimbi bà misambu, ne dīyì dimwe bààkasangisha bintu byònsò pamwe, ne bulongolodi bunene bwa basalaayi, kabidi ne—ne—ne makole a ditunga. Byònsò bìvwà binwàngàne bwa disangisha dinene, kadi bàkapanga kukonka Nzambi. Ki cyàkènzà kabidi Aakàbà, ki cyàkènzà kabidi bakwabo. Cikondo kaayipu's we!

⁸⁴ Mpindyewu eci kacinùpicikù to. Bàakapangila kucipeta, bwalu kabàvwa bakonke to. Ne pa kwenza kwa nanku... Tàngilàayi. Pa kuya kùdì baakwidi, pa kuya kùdì beena tèòlòjì, ne pa kuya kùdì beena makole a basalaayi, ne kubenga kwangatakù ne mushinga musanjeela wabò wa cikondo aci mutùma kùdì Nzambi, Natànà, bàakacyènza bibi. Bàakaya ne bàakambula mushèètè wà cipungidi awu ne kuwùtèèkabò mu ditempu dipyadipyà, kuwùtèèka mu ditempu dipyadipyà, anyì ne, “dingumba dipyadipyà nedibangè,” kadi kabiyi pa mushindu mufila kùdì Nzambi, mulongolola bwa kuwàmbwìlamù to. Bivwa bikèngela bwa kwambwibwawù pa makaaya a beena Lewi. Kadi, nudi numona’s, paùdì ubanga bibi, neùtungunukè anu ne kuya bibi.

⁸⁵ Dizajì dyòdì ne cya kwikala diludikila mu cintu cya diludikila, kadi wèwè kusàka ku luseke lubungu lwà cingoma mu ntàntà wa millimètre ne apa, anu ku ntwadijilu aku, mu ntàntà wa mètres makumi citeema udi ku luseke ne centimètres dikumi anyì dikumi ne yisatu. Udi mubange bibi.

⁸⁶ Éyi Nzambi wa yààyà, watùkwàcishakù’s bwa kumanya ne cintu eci ncibange bibi, bibilù binènè bya butangadiki bya díbà edi ebi, mùdibo bàbibìikila. Nzambi kì ngudibò bàkonka pa bwalu abu to. Baakwidi ne batendeleedi kì bàdìbo bóbò bàkonka. Malongolodi ngàdibo bàkonka. “Ee, nudikù baswe kwikala ne *cikampanda* anyì? Mémè ndi ngeela meeji ne, bu ne tuvwakù mwa kusanga bantu bônso pamwe!” Kanùsangi bantu bônso pamwe to. Petaayi anu Dìyi dya Nzambi pa bwalu abu.

⁸⁷ Pashiishe tudi tusangana ne, pàdìbo bènza nanku, cìdìbo bènza ncinyi? Mbatùngùnùke anu ne kuya buludi ne ndongamu wabò umwèumwè wa butendeleedi wa kale awu, udi pambelu pàà Dìyi dya Nzambi ne diswa dya Nzambi awu. Cintu aci’s cyàkafwà, kùkaadi bidimu, bintu bikùlàkàjì bikaadi byùme bya kùkaadi bidimu abi.

⁸⁸ Cìkaavwa cyùme mu matuku a Mukalenge Yesu. Kabàvwa bamanyè to. Wàkamba ne: “Bu ne nuvwa bamanyè Mòsà, nunku nudi baMmanyè Mémè, bwalu Mòsà ngwàkamba ne Mémè mvwa ne cya kulwa.”

Bóbò ne: “Baataatù beetu bàakadyà manà mu cipeela.”

⁸⁹ Yèyè ne: “Bônso’s mbafwe!” “Bampofo,” mwàkabàbìikilàYe, Bàfaalèsà, balombodi bàà ntendeleelu abu. “Nwènù kanùyì biitabùùje ne Mémè kì Yèyè awu to, nenùfwe mu mpekaatu yenu.” Kadi kabààkiitabuuja to. Bàvwa batàmbe kujaama mu mishindu yabo bóbò. Bìvwa bìkèngela bwa kwikalabo naaci mu wàbò mushindu.

⁹⁰ Kì mwàkacyènza Davìdì. Wàkacipeta mu wèndè mushindu, kì kwambaye anu ne: “Nudi bamanyè cìngènza anyì? Tudi tutentemuka.” Ûvwa ne dibuulula. “Tudi tutentemuka mpindyewu, pa nanku netwènzè mushindu mupyamùpyà.

Matuku a bishima àkaadi mamane kupita, pa nanku netùdyénzè anu bulongolodi bupyabùpyà. Netwénzè ditempu dipyadìpyà, tuleeja ne cintu cipyacìpyà cyàbangì.” Ciprofeta cya mashimi kaayi’s wè!

⁹¹ Bikèngela nwalukile mu mushindu wùdì Nzambi mwambe bwa kucyènza. Bàvwa bàwùtèèka pa makaaya a beena Lewì, ne pòpò apu nkumutu kwa mwoyi. Mushèètè wà cipungidi, Dìyì, kî ndya kwambwila mu dingumba dipyadìpyà, pa malongesha makwàtakaja a muntu kampanda to, kadi mmu mwoyi. Dìyì dya Nzambi kadyena ne cya kulengiibwa kùdì mangumba nansha; bidi bikèngela bwa kulengiibwaDì kùdì mwoyi wà muntu, mùdì Nzambi mwa kulwa ne kuDibuulula Yèyè mwine. Nenku yèyè ùcibuulula bilondèshile Dìyì, aci n’Nzambi; kabìyi nanku to, kî n’Yèyè to.

Ne, pashiishe, Dìyì dya movù awu! Bushuwa, Mùfaalèsà mmufwànyine kwamba ne: “Udi mutwàmbile ne katwena mwa kwenza *cikampanda* ne *cikansanga* ki nganyì pèndè’s? Mòsà’s ngwàkatùpèesha mèyì matùma aa.”

“Kadi’s Mòsà wàkamba kabidi ne . . .”

Sàtaanà kwambaye ne: “Mona’s, bààkafùnda ne: ‘Neàtuminè Banjelo Bèndè dîy- . . .’”

⁹² “Kadi’s bààkafùnda kabidi,” mwàkambà Yesu.

Muvù, dîbà! “Bu ne nuvwa bamanyè Mòsà! Nudi ne umwe wanùfùnda, m’Mòsà. Bu ne nuvwa bamanyè Mòsà, nunku nudi baMmanyè Mèmè,” mwàkambàYe, “bwalu Mòsà wàkafùnda Bwànyì Mèmè. ‘Mukalenge Nzambi wenù neàjuulè Muprofeta munkaci mwenu, munkaci mwa bàna beenu; Yèyè ki watèèlejabò.” Bu ne bàvwa bamanyè Mòsà, nunku mbaMumanyè Yèyè.

⁹³ Mpindyewu tèèlejààyi, ne ntema, mpindyewu eci kacìnùpìcìkù to. Nwamonu’s, cintu cya kumpala, pààkakonkàbo baakwidi, kukonkabo bantu banene bàà myànzù, kukonkabo basalaayi, kukonkabo disangisha dijimà, beena mutumba, bwa kudisangabò pamwe bwa disangisha dinene òvwà dîlwa adi, bààkapanga kucyènza mu mushindu mujaalàme. Kabààkakonka Nzambi to. Nenku, pa kwenza kwa nanku, pa kubenga kwalukila bwa kumona civwà dîbà!

⁹⁴ Kaa, mwaneetu, tèèlejà. Ndîbà kaayi ditùdì ne mwoyi edi? Ncikondo kaayi? Mmu dîbà kaayi mutùdì emu? Kî ndîbà bwa maalu àdîbo bàmba aa nansha. Abi bikaadi bimane kupita. Cilumbulwidi cikaadi pabwîpì mpindyewu. Nudi mwa kucimòna cibwayika. Nudi bavùlùke dibwe dya pa mukuna adi anyi? Dîbà dya cilumbulwidi! Nudi bavùlùke dîbuulula, anyi cikeena-kumona cya Mukaji-musela aci anyi? NùMulamààyi anu mu dikàsà. KanùMulekèdì ùpàtuka mu dikàsà to.

Monaayi: “Pa makaaya a baakwidi!”

⁹⁵ Kadi Davidi ne baakwidi bõnsò, bõbò bàvwà bulelela ne cya kwikala bamanyè civwà cimpè abu, kadi bwalu bùvwà cinyi? Baakwidi's bàvwà ne cya kwikala bamanyè civwà cimpè. Bafùndi, beena tèòlòjì, s'bìvwà bìkèngela kwikalabò bamanyè civwà cimpè, bwalu Dìyì òvwà dyambe bwa kabènji nanku to.

⁹⁶ Kadi leelu pàdìbo bàswa kwamba ne: “Kaa, Yesu Kilisto kèna umwèumwè awu makeelela, leelu, too ne kashidi to. Aci ndubùkù. Aci *ncikampanda*, *cikansanga*, anyi *cikankenga*.” Badi bàpanga kumona Dìyì dilaya. “Kaa, aci's civwà ndituku dishààle.”

Davidi kwambaye ne: “Kaa, ee, mpindyewu anjì indilaayi kakese. ‘Pa makaaya a—a baakwidi,’ aci civwà cya pààkapàtukà Mòsà apu. Cya bushuwa, twètù kaayi, netùwùtèèkè mu ditempu dipya dipya leelu ewu. Ndi mupete dibuulula pa bwalu abu.”

⁹⁷ Baakwidi kwambabo ne: “Amen, Davidi!” Nwamonu's, bapetè bwenzeji bwa kùdì nsangilu wabò mupyamùpyà wa bukwàntèndeleele awu, bwa ne bìvwà bìkèngela kudisanga ne kwenzabo mushindu *kampanda* ne mushindu *kansanga*, ki cyàkafikishà baakwidi ku dilènduka. Kabààkakonkakù muntu uvwa ukèngediibwa awu to. Kabààkacyènza mu mushindu mujaalàme to, ki bwa cinyi bààkapeta lutatu. Eyowa.

⁹⁸ Mèmè ndi ncìina ne, mu bintu bùngì cyanààna leelu ewu. . . Mulongeshi munene, umwe wa ku bàà batàmbe bunene bàà beena Mpenta, pààkiimanàye kumpala kwa kasumbù kàà batendeledi aku dilòlò adi mu Chicago, mèmè nguvwa ne cya kwenza dyòdì disangisha adi ne Beena Kantu-ku-byanza, kadi mèmè kwela meeji ne mvwa mufwànyine kwikala mu Afrike ciine cikondo aci, kadi ncìcivwa mfùminakù ku dyalukila dituku dya kumpala kwa kubangadi, ki bõbò kusungula mwena Mpenta munene wa mamanya a mu mutu, ne yèyè kubànda ne kubàmbilayè ne nkwa wa bukwàntèndeleele ewu uvwa ncintu cya Nzambi, ne kwambaye ne bõnsò bàvwà mwa kwalukila, nansha mene ekeleeziya wa Katolike neàpinganè ku ngiikàdilù wendè wa ku cibangidilu, bõnsò bààkula mu myakulu bu cileeki, ne bikwabo, kadi kàyi mumanye ne mbuteyi bwa dyabulu to!

⁹⁹ Kadi muntu uvwa, ncìvwà mumanyè to, mîngà misangu udi ukùna mamiinu, kwèna mumanyè cìikalà mwa kwenzeka to, kadi mfumu wa Beena Kantu-ku-byanza bàà Evanjeeliyo mu Kaabujimà, anu dya mwakudi munene awu usòmba, kwambaye ne: “Ncìtu ne meeji matùma ku dyamba dya bintu bibèngangana ne baakudi beetu to, kadi awu kî mmushindu wùvwà Mwaneetu Branham mwambe ne nebyènzekè to. Kadi yèyè mmwambe ne aci necilombolè too ne ku cimanyinu cya nyama wa lwonji.”

Yèyè ne: “Kadi Mwaneetu Branham kî mmumanye cidiye wàmba aci to.”

Yèyè ne: “Twètù tudi...twitabuuja ne mmumanye.” Nwamonu anyi?

¹⁰⁰ Kadi mu Chicago, ngâkamba ne: “Mbanganyì kaaba aka bàdi baswè bwa mèmè kufila wanyì ngumvwijilu wa cyôci aci?” Kubangabo kutuuta mikòbolo ne kwela mbila.

Nwamonu’s, udi ukùna mamiinu; kwèna mumanyè cìikalà mwa kwenzeka to. Tungunuka wèwè anu ne kwela Dimiinu. Pààfikà dîbà adi, bamwe bàà kùdîbo bàdi . . .

¹⁰¹ Bu Toomààsè, yèyè ki uvwa bu wa ndekeelu nanku bwa kumona Mukalenge. Kadi, byàkakèngela bwa kuMumona, bwa kuMwitabuujaye. Nwamonu’s, pàdîbo bàcìmòna cyènzeka. Kaa, Toomààsè wàkabwela, kadi wàkalwa pashìishe ndambu.

¹⁰² Mpindyewu pàdîbo bàmòna bintu bìdi bidyànjila kwamba abi, ne byamba ne EMU MMÛDÌ MUKALENGÈ WÀMBA, byènzeka, dîbà adi bàdi bàmba ne: “Tùpèèshaayikù ndambu wa Maanyi enu awu.” Nwamonu anyi?

¹⁰³ Kadi monaayi mpindyewu, bwenzeji. Míngà misangu bantu banene bàtu bàdisanga. Udi ubùmvwa bàmba ne: “Munene *Kampanda*, ne munene *Kansanga*, munene wetù . . .” Kanwènjikù nanku to.

Kakwènà banene munkaci mwetu to. Kùdi munene anu Umwepele, mwine awu n’Nzambi. Twètù tudi bàrà bàà muntu, balume ne bakaji. Nansha wèwè mwikàle mpaasàtà wa ekeleeziya udi ne bantu bataanu, aci kacýèna cikuvwiya mukese to; aci cidi cikwenza mwaneetu, wamònu’s, pawikalà ne lulamatu ku Dîyì dya Nzambi. Nansha cinyì, nansha munyi; kwèna ushààla mukese to. Nzambi kàtu ne bàrà bakese ne bàrà banene nansha. Yèyè ùdi anu ne bàrà. Bàdi bònsò anu bàà mwomumwe.

¹⁰⁴ Monaayi, Nzambi Yèyè mwine’s wàkafùmina mu myaba mitàmbe bulenga ya mu Butumbi, bwa kulwaYe umwe wetù. Mpindyewu munene mwaba awu nganyi? Wàkangata . . . Kààkalwa panshi apa bwa kwangata mmwènekeli wa mwakwidi to, kadi wa musadidi. KwoweshaYe diima diinè dyàkafukàYe adi màyi, makàsà a bapostolo Bèndè ne bakwabo. Mpindyewu munene ki nganyi?

¹⁰⁵ Kadi bwenzenji, ki bùvwà bantu aba bapetè. Bòbò kabààkuumvwa to. Bààkeela meeji ne cintu cipyacipyà necyènzekè, to, cintu kampanda cìvwà Nzambi kàyi mwambe ne necyènzekè. Bààkayakù mu mushindu mubi.

Ki dizùka dyònsò edi, pàvwà . . . bibangè kale wàwa, kùkaadi ntàntà mule, bikèngela bwa dingumba ne dingumba dyònsò diikalè ne mwondopi wa kùdi Nzambi; bìvwà bikèngela bwa dingumba ne dingumba dyònsò diikalè ne *cikampanda*, *cikansanga*, anyi *cikankenga*. Bìvwà bikèngela bwa dingumba ne dingumba dyònsò diikalèku ne kaaDavidi kampanda. Bìvwà bikèngela bwa dyònsò diikalèku ne *cikampanda*, *cikansanga*, anyi *cikankenga*. Nwamonu cidi cyènzèke anyi? Cyènjì cintu

cimwecimwe cyàkenzàci kaaba aka. Cintu anu cimwecimwe aci's. Bwenzeji!

106 Dìyì bwa movù awu, cikondo civwàbo ne mwoyi aci, mbyàkabèngàbo kucyùka.

107 Monaayi ne, “makaaya a beena Lewi,” ki civwà mushindu wà ku cibangidilu, mulongolola wà Nzambi bwa kwenza bintu ebi. “Ikàlaayi nwambwila mushèètè wà cipungidi awu pa makaaya a beena Lewi.” Cyònsò civwà kaciyi aci civwa cibèngàngàne. CivwàYe Yèyè wàmba aci, ki civwàYe muswe kwamba. Nzambi kèna mwa kushintuluka nansha. Ki bwa cinyi, shààlaayi ne Dìyì Dyèndè! Mémè ndi ne Mufùndù, eyowa, Kulondolola wa Kumpala 15.15, panwikalà baswè kucifùnda. Monaayi.

108 Mpindyewu monaayi, mwaba awu, mu kulonda kwa Nzambi amu. Mpindyewu ndi muswe bwa nwènù kufùnda cyòcì eci mu mushindu kampanda mu meeji enu amu. Bwa kulama mèyi matùma a Nzambi, bwa kwenza cintu kanà cyònsò cijaalàme bwa Nzambi, bwa kwenzela—bwa kwenzela Nzambi mudimu mu mushindu mujaalàme, kùdi bintu bitaanu bidì ne cya kwenjiibwa, bwa kwenzela Nzambi mudimu mu mushindu mujaalàme

109 Mpindyewu Davidi ùvwa wènzela Nzambi mudimu. Ùvwa wènza cyònsò civwàye pèndè mumanye mwa kwenza aci, pa kuumusha kushiya kwa Nzambi ku luseke. Nwamonu anyi? Ùvwa wènza cintu kampanda civwà cijaalàme, cintu cimpè bwa cisàmba, cintu cimpè bwa ekeleeziya.

110 Kadi bintu bitaanu bidì ne cya kwenjiibwa ebi, ndi muswe bwa nùvulukè byòbi ebi. Muntu nansha mwikàle ne meeji matòòke a bìshi mu dicyènza, mu kwenzela kwa Nzambi mudimu, eci, bitaanu ebi bidì ne cya kwikalakù.

Cya kumpala, cìdi ne cya kwikala dībà Dyèndè Yèyè dya kucyènza.

111 Anjì ambàayi tǔng bu—bu Mòsà mulwe, wàmba ne: “Netwibakè bwâtù bwa twètù kulèlema pa musulu wà Nil, mwàkenza Nowà amu”? Cikondo cya Nowà civwa cimpè bwa bwâtù, kadi kī mbwà cyèndè cikondo yèyè to.

112 Anjì ambàayi tǔng bu Yesu mulwe, mwambe ne: “Mpindyewu Mémè ndi nwàmbile citwènzà. Netùbandè anu pa mukuna, mwàkenzà Mòsà amu, bwa kupeta difila dipyadipyà dya mikenji”? Nwamonu anyi? Huh-uh! Yèyè's ki uvwa mikenji ayi. Nwamonu anyi?

113 Wèwè udi ne cya kwikala mu cikondo Cyèndè Yèyè. Cìdi ne cya kwikala mu movù Wèndè Yèyè. Nuumvù aci mpindyewu anyi? Cìdi ne cya kwikala mu cikondo Cyèndè Yèyè. Cìdi ne cya kwikala mu movù Wèndè Yèyè, cikondo ne movù.

114 Ne cìdi ne cya kwikala bilondèshile Dìyì Dyèndè dikààdi dyakùdiibwe. Cìdi ne cya kwikala. Nansha wèwè wamba bimpè

ne bivwa bikèngela *cikampanda* ciikalèku, anyi bivwa bikèngela *cikansanga* ciikalèku, anyi bivwa bikèngela *cikankenga* ciikalèku. Bidi bikèngela ciikalè bilondèshile Dîyi Dyèndè, bilondèshile cikondo Cyèndè ne muvù Wèndè.

Ne cidi ne cya kwikala cifiidiibwe bilondèshile, bacipèèshe muntu udiYè musungule bwa kucyènzela kùdiye awu.

¹¹⁵ Nansha byôbi ne mbantu banene bàà myânzù bàà munyi. S'ki mfumu Davidi nyêyè awu, munene anu mùdi yônsò wa kùdibo. Yêyè's ùvwa mfumu kumutu kwa ditunga. Kadi Yêyè ùvwa ne mushindu wà dicyènza, ne Ùvwa mubâmbile mùvwàYe mwa kucyènza. Kadi bôbò bàakapanga kucyènza.

¹¹⁶ Cidi ne cya kwikala bilondèshile Dîyi Dyèndè, bilondèshile cikondo Cyèndè, bilondèshile ndongamu Wèndè.

¹¹⁷ Ne cidi ne cya kwenjiibwa kùdi muntu udiYè musungule bwa kumupèèshaci ne bwa kucyènzayè awu. Mòsà wàkateeta kucinyeema ne: "Angàtaku muntu mukwabo." Kadi Nzambi ùvwa musungule Mòsà bwa kucyènzayè. Bàbûngì bàà kùdibo; Pòlò wàkateeta bwa kuumushamù mukolo; bakwabo bààbûngì. Kadi bidi bikèngela cyènjiibwè kùdi ewu udiYè ùsungula bwa kucyènzayè awu.

Ne cidi ne cya kulwa, dyambedi, kùdi baprofeta Bèndè. Dîyi dya Nzambi didi ne cya kulwa kùdi baprofeta. Amòsà 3.7: "Mukalenge Nzambi kàakwenza cintu nansha cimwe pàdiYe kàyi mwanji kuCibuulwila musadidi Wèndè muprofeta to." Inaayi.

¹¹⁸ Ne muprofeta awu ùdi ne cya kwikala mushindika ku Dîyi dya Nzambi.

¹¹⁹ Ki bintu byenu bitaanu bìdi ne cya kwenjiibwa mbyôbi abi. Cidi ne cya kwikala mushindu awu. Cikondo Cyèndè, muvù Wèndè, mùdiYe mwambe ne neciikalè amu; ne muntu udiYè musungule; ne cidi ne cya kulwila kùdi muprofeta; ne muprofeta ùdi ne cya kwikala muprofeta mushindika. Tudi tusangana ne, bààbûngì bàà kùdibo mu Bible, cìvwa cìlwa kùdi baprofeta kadi kaciyi cishindikiiibwe to. Wetù Muprofeta n'Yesu Kilisto.

¹²⁰ Pa nanku monaayi mpindyewu, nwamonu's, Nzambi kàvwa mubàbuulwile cintu aci ku mushindu Wèndè mulongolola wa dicyènza to. Bôbò bàvwa biitàbe mushindu wà Davidi awu. Bàvwa biitàbe mushindu wà baakwidi awu. Bàvwa biitàbe mushindu wà bafùndi, wà beena tèlòlòji, kadi kî mmushindu wà Nzambi to. Natànàèlè, ùvwa, yêyè nguvwa muprofeta wa dituku adi. Pashiiishe, Natànàèlè wàkabàmbila mwa kucyènza. Kadi, nwamonu's, bàakacyènza kabàyi bakonkè Natànàèlè to. Dîyi nansha dîmwe kadyènakù dyàmbe ne bààkakonka Natànàèlè to. Bwenzeji bwônso, cintu cinène munkaci mwa kutungunuka! Kadi, ekelekele, mèmè ndi ngeela meeji ku musambu awu wà ne: "Lekela, lamà . . ."

Nkwàcishèku, Mukalenge, pàdì myoyi
 mikwate kapya apa,
 Enzàku bwa mpwekeshè maditambishi àànyì
 (bwa kuya ne bakwabo), nsokè mèmè anu
 Dìna Dyebe;
 Ùdongèshèku bwa kubenga kweyemena bìdì
 bakwabo bènza,
 Ngìikalè anu mwindile mu disambila
 dyandamuna dya Kùdì.

Nwamonu's, ki mushindu wà kwenza ngwôwò awu.
 Neimònè mèmè cyènzeka mu mushindu mujaalàme, dībà adi
 neciitabuujibwè.

¹²¹ Mpindyewu, Nzambi ùvwa mubàbuulwile cintu aci kùdì
 Davidì, ne kùdì bambi, ne kùdì bantu, ne kùdì baakàpíteenà bàà
 binunu, ne baakàpíteenà bàà nkama, kadi kî nkùdì Natànàèlà
 uvwa ne EMU MMÜDÌ MUKALENGE WAMBÀ awu to. Kadi
 Mukalenge ùvwa mwambe ne Yèyè kàvwa mwa kwenza cintu
 nansha cimwe to pàvwàYe kàyi mwanjì kuleeja, dyambedi,
 muprofeta wa cikondo awu cya dýenza. Nwamonu cyàkenzàbo
 anyì? Bàakapàtuka buludi mu Dìyì dya Nzambi, kuya e kutèeka
 mushèètè wa cipungidi awu mu ditempu dipyadipyà. Nwamonu
 anyì? Pa nanku bàakaya kacýenza kacyi bilondèshile dìyì
 ditùma dya Nzambi ne mushindu mulongolola wà Nzambi to.

Ne cyôci aci ncidì cyenzèke leelu ewu, balunda bàànyì.
 Ki bwa cinyì tudi benzè bibilù binène bya butangadiki búngì
 cyanàànà, ne bikwabo, kadi kakùyì bipeta to. Bupidya bulwè
 kuvulangana, mpekaatu mulwe kuvulangana, kabidi... Ndi
 nnwambila ne, bwa edi ditunga nkujikè; kî ng'anu edi ditunga
 nkààyaadi to, kadi matunga makwabo kabidi. Edi ditunga,
 byenzè bu Angletterre wa cikondo cikwabo cyàcya, ndishààle
 ndumba wa matunga makwabo ònsò.

¹²² Munda menemene mwa Mozambique mwàmwa, mu ntàntà
 wa kilòmèètà nkama mwandamutekete ne makumi asambombo
 ne mwadamukulu kule ne dishidimuka, mu bisuku ne meetu,
 bânà baamùyààpàndì bàdì bàtèèleja Elvis Presley, banyungisha
 mitu ne bàtùpika bàya muulu bààlukila mushindu awu, bufùkù
 bujimà, biikàle ne nshinga... Anyì, tusanji tukese mushindu
 ewu tуди tùkòka mèyi mu ntàntà wa kilòmèètà cinunu ne nkama
 yisambombo, too ne mu Rhodésie, bwa kukwàta dìyì dya Elvis
 Presley. Kadi bàmba ne: "Mmutendeleedi wa dikema, yèyè ne
 Pat Boone, ne bakwabo abu." Mona's, yèyè's n'Yudaàsè wa dībà
 edi, kadi kî mbamanyè to. Cibadi cidì cibi's ki cyôci aci, bàdì
 biitabuuja ne bôbò abu bàdì—bàdì mu bulelela.

Yesu kàakambilakù Cikondo cya Ekeleeziya cya Laodikiya
 eci ne: "Wèwè udi butaka, mwena dikenga, mukèngeledi wa luse,
 mpofo, kadi kùyì mumanyè" anyì? Kî mbacimanyè to!

¹²³ Ee, bàna bàà beena Mpenta bàà mu Afrike ne kukwàbò kwònsò, bàdi bàmba ne: “Ee, Elvis Presley, ùdi ne ngimbilù mutàmbe bulenga wùtù kùyikù mwanjì kuumvwa to.” Kakùyì mpatà to ne Davidi pèndè uvwa nendè; kakùyì mpatà to ne bimbi bàà misambu abu bàvwa pààbò nendè, kadi’s ncyàkatwàlà lufu lwàkadikùmà mu citùùdilu alu. Nudi numona kùkaadibo, kutùkaadi leelu ewu eku anyì, nwènù balunda bàànyì?

¹²⁴ “Makaaya a beena Lewi,” ki cìvwà mushindu wà ku cibangidilu wà Nzambi wà dicyènza. Kadi bòbò bààkawùtèeka mu ditempu dipyadiyà. Mpindyewu, kabyàkukùmbanakù to. Kabàvwa bakonkè mushindu mujaalàme to. Nwamoni anyi? Pa nanku, bààkapàtuka mu njila, pa bwalu abu, ne bààkaya naabi mu mushindu mubi.

¹²⁵ Nenku ki cìdì cyenzèke leelu ewu ncyòcì aci. Pàdi bantu, nansha ne meeji matòòke a bishi, bàteeta bwa kuMwenzela mudimu kaciyi mushindu Wèndè mulongolola wà dicibuulula to, bàdi misangu yònsò anu bàbibwejakaja. Nzambi ùdi ùcitàeka mu Wèndè mushindu. Nwènù bantu, nansha nwènù ne meeji matòòke a bishi, panùdi nuteeta bwa kucyènza bishilàngàne ne cyòcì aci, nenù—nenùbinyangè.

¹²⁶ Byenzè bu mùvwà Baalàmà, mu dituku dya Baalàmà. Nzambi wàkambila Baalàmà, muprofeta awu. Ùvwa muprofeta, muprofeta Baalàmà. Ùvwa muprofeta, nenku Dìyì dyàkalwa kùdiye anu menemene, dyàmbe ne: “Kùyì kuntwaku to. Abu mbasungula Bàànyì. Adi ndisungula Dyànyì.”

Kadi Baalàmà kupetanganaye ne bantu banene bàà myànzù, basalaayi, bayiishi, bantu bàvwà bapetè bwenzeji, kwambaye ne: “Ee, ndi—ndi nnwambile ne, mfumu neikala . . .”

Nwamoni’s, bikùmbànàngàne anu menemene ne bya Davidi, bikùmbànàngàne ne bya leelu ewu. Angàtaayi anu byònsò mu cifwànyikijilu, nenku nenùcìmonè. Nudi nùcìmonà anyi? Ambàayi ne: “Amen.” [Disangisha didi dyàmbe ne: “Amen.”—Muf.] Nwamoni’s, nwamoni’s, anu mùdibi mpindyewu’s.

¹²⁷ Kadi balombodi bàà ekeleeziya kwambabo, baa—baa—baakwidi kwambabo, bafùndi kwambabo, beena tèòlòjì kwambabo, ne: *Ewu* ki mushindu wùdici ne cya kwenjiibwa.” Kadi, kabìvwa nanku to, ne kujaadikiibwabi ne kabìvwa nanku to.

¹²⁸ Kadi Nzambi ùvwa mwambile Baalàmà, ne yèyè ùvwa muprofeta, dyambedi, kumwambilaYe ne: “Kùyikù to.”

¹²⁹ Kadi bwenzeji bwa kùdi bantu bakwabo aba bwàkamufikisha ku dicyènza bibèngàngàne ne mùvwà Nzambi mwambe bwa kucyènza, ki kulwaci mulawu pamutu pàà kwikalaci ditàbuluja. Kaa, bushuwa’s, kuyaye kuntwaku ne kulongeshaye bantu, kwamba ne: “Mpindyewu anjì indilaayi! Nudi bamanye mùdi bwalu anyi?” Yèyè ne: “Twètù tudi—tudi

beena Moàbà. S'nudi bavùlùke ne, mwànà wa bakaji wa Lotà ki wetù mukalenge-mukaji. Yèyè's ki wetù nkambwa. Tudi bônso bàà mashi amwe. Tudi bônso... Mangumba etu ônsò àdi a mwomumwe." Kanùdisangiku ne cintu aci to. Shààlaayi kule naakù. Nwamonu anyi? Ki kwambaye ne: "Tudi bônso anu mwomumwe. Mona's, bantu beenu bàdi anu mùdi bantu bàànyì. Tudi mwa kuselangana, munkaci mwetu, umwe munkaci mwetu, bwa twamòna mwa kwikala ne nsangilu wa bukwántèndeleele mulelela. Nwamonu anyi? Twètù bônso tudi mwa kudisanga ne kwalukila cyakabidi ku cintu cya ku cibangidilu aci."

Nzambi kwelaYe cintu aci mulawu. Awu mpekaatu kabààkamufwilakù Izaleela luse to. Wàkashààla mubàlamàte matuku abo ônsò. Kààkafwidiibwakù luse to. Bàkabùtukila nendè mu cipeela. Ncya bushuwa. Bwalu kabààkangata mushindu mulongolola kùdi Nzambi ku mushindu Wèndè mushindika wà dicyènza to.

¹³⁰ Monaayi, cintu cyàkenzàbo eci cyàkafikisha Izaleela ku kufwa lufu lubi, mu cipeela. Ne Yesu wàkamba ne: "Bônso muntu ne muntu bàkabùtuka ne kwàbò kujikè." Tàngilàayi numone ne mbanganyi bààkashààla biimàne ne Mòsà kuntwaku: Yoshùwà ne Kaalèbà, mu—mu ndongamu awu.

¹³¹ Monaayi kabidi, ki Davidi nyèyè ewu, cyàkenzàye aci. Ne pàkacyènzàye, cyàkenzàci ncinyi? S'cyàkafikisha lufu ku dituuta muntu uvwa ne meeji matòòke.

Mpindyewu, ngeela meeji ne tucidi anu ku nshinga, ne ndi muswe bwa nwènu kutèeleja mu ditunga dijimà.

Cintu cyàkenzà Davidi eci, kàyikù ùkonka Natànàèlè ne wàngatakù Dìyì dya Mukalenge bwa bwalu abu to, cyàkafikisha lufu bwa kutuutalù bantu bàà meeji matòòke. Eyowa's, mukalenge. Kwololaye cyanza, yèyè uvwakù musòmbèle mu bwikadi bwa mushèètè wà cipungidi awu; wòwò wùvwa wùpàtuka mu nzubu mwèndè—mwèndè. Nenku ngombe kutetukayè, ne mushèètè wùkaavwa wàmba kupona.

¹³² Bóbò bàkaavwa bamanè kwenza cintu cibi cimwe, bintu bibi bibidi. Cya kumpala, kabàvwakù bakonkè Natànàèlè to. Cintu cìvwà cilondèle cyàkenzàbo, bààkaya kuntwaku kabàyikù bakonkè Dìyì dya Nzambi to. Bwalu, kùdi... Samwèlè ùvwa Dìyì mu dituku adi... Nenku yèyè kààkakonkakù Dìyì dya Mukalenge to. Dìbà adi, pààkenzàbo nanku, bààkenza bibèngàngàne ne Dìyì dya Nzambi.

Nenku muntu mwìmpè ewu, uvwa mulami wa ditempu, ùvwa mwepiskopo ewu, kudyàmbidilayè ne: "Ee, apa, ncyèna muswe bwa kulekelabo Nzambi ùpòna panshi to," ki kutèekaye cyanza pa mushèètè wà cipungidi. Bya bwalu, yèyè kàvwa mwena Lewi to, ki kufwaye. Bintu bisatu!

¹³³ Mpindyewu elàngànaayi meeji bya bikole, ne tàngilàayi nùmonè cidi mangumba menze leelu ewu. Nwamonu's,

mbaCìdyombòle, baCìbìikile ne “ndilongesha dya mashimi.” Nwamonu anyi? Tàngilàayi kùkaadibo. Nebàpetè nsangilu wabò wa bukwántèndeleelelu awu, eyo. MbaCìbìikile ne “ndibala dya mu meeji a bantu,” pààbì Nzambi Yèyè mwine munkaci mwa kuCishindika ne ki Bulelela, ne kujaadika mùdìCi Bulelela. “Kaa, bôbò’s bàdi anu mmusumbà mukese wà bidingidingi kuntu kwàka,” mùdibo bàmba, “kî mbamanyè bidìbo bàmba abi to.”

Ncya bushuwa, katwena bamanyè to. Kadi tudi twamba twètù anu Méyì Èndè cyanààna, kadi Yèyè ngudi mumanyè cìdìYe wàmba, nwamonu’s. Mémè ncyèna mwa kuCyùmvwija to, anyi muntu mukwabo nansha umwe, kadi Yèyè—Yèyè—Yèyè ùdì ùCijaadika.

¹³⁴ Mpindyewu monaayi. Beena kwitabuuja bààbùngì bàà meeji matòòke leelu ewu, bàdi bàlwa kùdì Kilisto, baswè kulwa ne mwoyi wàbò wònsò, bàdi bàshebeyiibwa mu nyuma mushindu wumwewumwe awu. Bantu bààbùngì bàà meeji matòòke bàyaaya mu ekeleeziya wa Katolike ne bàjinga bwa kulwa beena Kilisto, bàya mu ekeleeziya wa ba-Méthodistes, wa ba-Baptistes, mu église de Christ, ne mu beena Mpenta mene, nwamonu’s, muntu ùjinga kwikala mwena Kilisto, utèèkapù cyanza, ùdìvwija wa ku bôbò abu.

¹³⁵ Kadi pààkamònà Davidì cintu eci cyènzeka, kumutàbulujaci. Kùtàbuluku dîbà dimanè kupita kuntwaku to, mwaneetu. Yèyè wàkamòna ne lufu lwàkadikùma.

Ndeejè wèwè bipeta. Bwa cinyi ditàbuluja dya ku dîna edi, diikàle dyàluja bantu mu maeeleeziya, ndyenzèle ditunga cinyi, ndyenzèle mu—mubidi wà beena kwitabuuja cinyi? Kî ndyenze cintu to anu malongolodi ne mangumba mapyamàpyà, ntàntà yònsò mujimà ewu, kuvudija anu bidimba ne bikwabo. Ditunga ndilengèle anyi? Bàvwa bàmba ne nebìikalè mwa . . .

¹³⁶ “Amerike. Nzambi àbeneshè Amerike. Yèyè—yèyè nditunga, ditunga dya beena Kilisto.”

Dyôdì’s didi ntàntà wa mùlìyô wà kilòmèètà kule ne kwikala ditunga dya beena Kilisto. Mémè ncyèna mene ndisambidilakù to. Mmunyì mùndì mwa kudisambidila, pàdidi kadiyi diswè kunyingalala ku bwenzeji bwa makole manene a Nzambi mamwènèshùibwe kumpala kwàdì aa; kadi diikàle dîvila, ne dîDikàngila biibi, ne dyàsa lwendu dîya? Ndi ndilàmbula dyôdì kùdì Nzambi. Kadi dyôdì didi ditàmba anu kuya kule. Kadi mpindyewu neditukine mu màyi. Tàngilàayi anu cyanààna nùmonè cìdì cyènzekà.

¹³⁷ Bantu bààbùngì bàà meeji matòòke bàya kashààla bàà mu bulongolodi, anyi cisùmbù kampanda, anyi kasùmbù kàà ntendeleelelu kàà mushindu kampanda, kadi ki kufwàbo eku’s, mu nyuma. Kwènàku ne cyùdì mwa kubambila to. Bàdi ne bintu abi byelè miji munda mwabo ne: “Mona’s, beepiskopo aba’s

mbàdi bambe eci. Ne *cikampanda's* ncyambe eci, ne *cikansanga's* ncyambe eci.” Udi ubàleeja mu Diyì dya Nzambi emu mene mwaba wùdici EMU MMUDÌ MUKALENGE WÀMBA. “Kadi wetù mpaasàtà. . .”

Cìdi wenù mpaasàtà wàmba nansha ciikàle cinyi, cìndi mèmè ngamba, anyì cìdi muntu mukwabo yònsò wàmba nansha ciikàle cinyi. Cyôci cibèngangana ne Diyì dishindika dya Nzambi, dîbà, cikondo, Mukenji, ne bikwabo, ùcipwè mwoyi. Shààla kule naaci. Ne nebikèngelè bwa mèmè kwimana kumpala kwa yònsò wa kunùdi mu Dituku dya Cilumbulwidi, ne nudi bamanye nanku. Ne ncyèna mufwànyine kwamba aci pàànyì anu bwa cyaààà to, bu mündi mumanye ne nkàadi muntu mununu mpindyewu. Mèmè nè- . . . Kî nne mèmè ndi mumanye cintu kampanda to, kadi Yèyè ngudi mumanye. Ndi mèmè ndonda anu cidiYe Yèyè wàmba aci.

138 Tàngilàayi leelu ewu bibilù binènè bya butangadiki bitùdi benze mu ditunga dijimà abi. S’mbijaadikiùbwe ne mbyenjiiùbwe mu cijengu. Ne Yesu kàakambakù mwaba ewu mpindyewu, mu Luukà 7.7 emu ne: “Bàdi bàNkuukwila mu cijengu” anyi? Davidi wàkalwa ne mushèètè wà cipungidi awu mu cijengu. Aakàbà wàkalongesha baprofeta abu mu cijengu. Baalàmà wàkangata mfranga ayi mu cijengu, “Bàlongesha mèyi matùma a bantu bu ne ki Dilongesha.” Mèyi matùma a Nzambi ngàdi ne mushinga, nansha meeji matòòk- . . .

139 “Bantu abu’s bàdi ne meeji matòòke bulelela.” Nutu nuumvwa bikole bàmba cyôci ne: “Bàdi ne meeji matòòke be.” Aci kacyèna ne cìdici cyùmvwija nansha. Ba-Témoins de Jéhovah, ba-Adventistes du Septième jour, ne tusùmbù twònsò twa ntendeleelu atu, bàdi bàpátuka mu mùsèèsù emu bènza bintu bìdi nansha umwe wa kutùdi kàyikù mufwànyine kwenza to. Beena Katolike bàtu bìimana mu masangu a njila bàlòmbangana kàà pa luse, ne bikwabo, tusùmbù twabo atu mushindu awu, pààbo ne ndola binunu bya miliyô kuvudija ku binunu bya miliyô kuvudija ku binunu bya miliyô, biikàle anu balomba kàà pa luse. Ne meeji matòòke, kakùyi mpatà to. Ekeleeziya yìya ne—ne yikayiisha, ne bikwabo, ne bambi bìimana mu cyambilu bènza ne mwabo mwònsò bwa kufikisha bidimba bipyabìpyà ku dibwela mu ekeleeziya yabo; kadi s’mmushèètè wà cipungidi mupyamùpyà awu.

Kùdi Mushèètè wà cipungidi anu wumwepele wà dilonda, ki Diyì dya Nzambi. Cyònsò cya cibèngangana ne wòwò Mushèètè wà cipungidi awu, shààla kule naaci! Cìdi mu ditempu dipyadiyà, kadi kacyi pa makaaya a Nzambi to. Cya bushuwa. Shààla kule ne cintu aci. Kwikadikù naaci bwalu nansha bumwe to.

140 Bibilù byetu binènè bya butangadiki, bantu miliyaalà ne miliyalà mbajikùle diitabuuja dyabo. Kadi ndi ngeela

mpatà bwa ne mbafwànyine kwikala lukama, pa bônsò abu. Nwamonu's, kacitu anu cintu ciine to.

Kadi tàngijà mèsù ku mulayì wà Dìyì.

¹⁴¹ Newèlè meeji ne ncipangìle bwalu, ne twètù tudi bamanyè ne ncipangìle. Bamwe bàà ku benji bàà matàbuluja bàà—bàà batàmbe bunene mu ditunga leelu ewu bàdi bàmba ne mbipangìle bya byènza ne mwadi. Ekeleeziya's mmumanye ne mbipangìle. Bantu bônsò mbamanye ne mbipangìle. Ee, mbwà cinyì abu? Mbipangìle bwa cinyì?

Cìvwa mbwà kiipàcìlà kîmpè. Cìvwa mbwà kufikisha bantu mu Bwikadi bwa Nzambi, bibilù binènè bya butangadiki abi. Ne miliyò ya bantu mmbatùùlètùùle mfranga, ne bayèlè mu bibilù binènè bya butangadiki. Ekeleeziya yikaadikù yônsò midisangè, mu mabalaasa manene, ne bintu binènè, ne bintu binènè bikaadikù byenzèke. Mbipangìle bwa cinyì? Mbwalu kabàtukù bamanyè dîbà dîdîbo ne mwoyi to.

Kabyena bikèmesha to mwàkiimanà Yesu, ne mwàkadilàYe mwadi mu mwoyi Wèndè. Binsonji byàkaMupwekela pa matama, ne Wàkamba ne: “Yélusàlèrà, Èyì Yélusàlèrà, mmisangu bùngì kaayì yínkaadiku Mémè ewu muswe kukukùngwija, mùdì nzoolo wa cikuka ùkùngwija twànà twèndè (wèwè udi mwase muprofeta yônsò ùNdì mukutùmine mabwe), kadi kwèna muswe to! Kadi mpindyewu dîbà dyebe dyàfiki.”

¹⁴² Kwènàku mwa kuumvwa Nyuma Mwîmpè wèlèla mbila mikole munda emu anyi? “Kaa, États-Unis ne buloba bujimà, mmisangu bùngì kaayì yínkaadiku Mémè ewu muswe bwa kunùkungwija, kadi kanwena baswe to. Mpindyewu dîbà dyenu dyàfiki. Nzambi wenù wa bisànkasanka awu, nzambi wenù wa bukooya awu, nzambi wenù wa Sodomà ne Gomòlà awu, nyawu ùkaadi mulwe munkaci mwenu.” Nansha mene bânà beetu bakese balela, nsuki mikòsa bu ya baamùyààpàndi ne myalala ya nsuki mibàlèmbèlèle mu mpala, s'ntwànà tukese twà nsòmbelu mukonyàngàle tùdì túbangà atu. Bakaji beetu kwàbò kùkaadi kujikè. Cìkaadi cipite ciyè ne dyamwàmwa dya bupikudi. Balume beetu bàkaadi balwè bilùmaabikàji binènè, bènda bèndakana bavwàle tùpanù tukese, twìpì, ne bènza maalu bu mwànà wa bakaji, ne nsuki mibàpwekèle mu makoshi. Nenku tudi beena Sodomà, ne kapyà ne ciiji cikole cya Nzambi mbitwîndile.

¹⁴³ Nudi bamanyè mwàshebeyàYe, mwacibùtulàYe anyi? Mushindu wùkaadiYe mwenzènze awu. Pàvwà ndumba wènza cintu cya cibi, bàvwa bàmwasa mabwe bàmushebeya; bàvwa bàngula mabwe bwa kushebeya mukaji uvwa ndumba. Mushindu awu ki wàshebeyàYe ekeleeziya. Bible mmwambe ne Yèyè neàlòkeshè mvula wa mabwe àfùmina mu maulu, ikalà ne bujitu bwa kilò makumi anaayi ne yitaanu ku dibwe dimwe, nenku yèyè neàbàshebèye ne mabwe. WàMwimanyika ki nganyi?

Mmaalu kaayi a mamanya ikalà mwa kwamba ne kacyèna mwa kwenzeka? Yèyè's neàcyénze.

Bya mwomumwe ne mwàkenzàYe bwâtù e kulèlemija Nowà mu dikubiibwa amu, Yèyè neàcyénzè cyakabidi bwa Ekeleeziya Wendè.

Nenku ku mikenji Yèndè Yèyè mwine ne mushindu Wèndè Yèyè mwine, Yèyè neàshebeyè ne mabwe ndumba udi mwendè masandi ne bamfumu bàà pa buloba ne baakàpíteenà bàà nkama ne bàà binunu awu. Yèyè neàmwasè mabwe àmushebèyè, ku mikenji Yèndè Yèyè mwine yidiYe mutèèke mu bulongame ayi. Nganyì wàmWambila ne Yèyè kèna mwa kwenza mvula wa mabwe?

¹⁴⁴ Anjì konkàbi muntu kampanda udi mumanyè mùtù dimata dya mvula dìbanga. Nenku dyòdì didi dyènza cijengu, ne dyàlukila dìpìcila mu cinyùnguluji kampanda; cidi ciàmbulu anu kuàmbulu, too ne pàdìdì dìneema bujitu kampanda, ne pashìishe dimata panshi.

Yèyè, Nzambi, Yèyè uvwa...dikokiibwa dya kùdì buloba kàdìvwakù mwa kuMulamina panshi to, kàdì Wàkabànda e kuya mu Dyulu. Nzambi, Yèyè wàkenza dikokiibwa dya kùdì buloba awu, ùdì kabidi mwa kwenza cinyùnguluji bunene bukùmbàne bwa kunyùngulula dibwe too ne pàdìdì dìpeta bujitu bwa kilò makumi anaayi ne yitaanu. Yèyè mmwambe ne Neàcyénzè, ne Yèyè neàcyénzè. Nganyì wàmWambila bwa kacyènji? Yèyè neàcyénzè, bwalu Yèyè mmwambe ne Neàcyénzè.

¹⁴⁵ Tudi mu matuku a ndekeelu. Tudi biimàne pabwìpì ne cilumbulwidi. Bwa cinyì? Bàdì bàteeta kudya manà a kale àkamata kuntu kwàka kùkaadi bidimu makumi ataanu awu, ekeleeziya wa Mpenta. Ekeleeziya wa Cijila ùdì ùteeta pèndè, a kùkaadi bidimu bipìte pa nkama yibidi. Ba-Luthériens, a kùkaadi bidimu biipacila ku nkama yisatu, anyì bipìte apu, a kùkaadi bidimu's, a kùkaadi bidimu nkama yàbúngì. Bàdì bàteeta kudya manà a kale. Kaa, mwaneetu, cintàkanyì aci's cikaadi cilèngàme. S'cikaadi citàpìle twishì. Neciikale... Cikaadi ne—cikaadi ne... Mona's, mvwa misangu yònsò ngamba anu ne, tusàndà tubwelèmu, bikusù. S'nebikushebèyè, wèwè mubìdye.

¹⁴⁶ Anjì kujandulaayi tǔng ní Davidì anyì ní nganyì wa ku bakwabo abu ùvwaku mukonkè Dyàmpà dya dìbà adi.

Baakwidi, ne baprofeta, ne bayiishi, ne beena tèlòlòjì, ne bilongelu, ne mangumba, bu biikalakù anu bakonkè dìbà's wè! Kadi mpindyewu kacyàkubàkwàcishakù to. Cikaadi cimane kupìcila matuku. Kacyàkwambulwishakù to nansha dikesè. Mukaji awu bwèndè mbujikè mpindyewu. Ùkaadi musambùke mukàlù awu kùkaadi bidimu bitwe ku bitaanu, pankaci pàà kanyinganyinga, cilumbulwidi ne luse.

¹⁴⁷ Monaayi, cìdiku ncinyi dîbà adi? Cìdi mwa kwenza ncinyi? Cìdi cìkèngelà kwenza ncinyi? Tùkonkàayi muprofeta, Bible, Kutùdi katùyi mwa kusakidila anyi kuumushila. Twètù basàkìdile anyi buumùshile, Nzambi ùdi ùtùùmusha ku Mukanda wà Mwoyi.

Bible mmwambe, mu Maalàkì 4, cìvwà mwa kwenzeka leelu. Bwàkabuulwibwà 10, mùvwa Bitampi Mwandamutekete mwa kukàngudiibwa ne kubuulula maalu masokoka ònsò aa àvwà masokoka mu bikondo bya balongolodi aba! Yèyè mmwambe mùvwàci mwa kwenjiibwa. Cìdi mu Bible: EMU MMÙDÌ MUKALENGE WÀMBA. Nzambi mmumanyishe cyòci aci bulubulu, mu mushindu mupwàngàne; ne muCìshindike ne m'Bulelela, ku bimanyinu, maalu a kukema mu maulu, muulu, ne bikwabo byònsò, munda mwa bidimu makumi asatu ne bisatu.

Nudi nwela meeji ne bóbò nebàCìtèèlèjè anyi? To. Bóbò mbafwe. Mbeelè cyanza mu cintu kampanda cìdi cishebèye cintu cyònsò mu kaabujimà. To, kacyàkwenzeka to; kacyàkwenzeka kabidi to, kashidi kààci.

¹⁴⁸ Pààkenzekà ciine cintu eci apu, ki pààkamònà Davidi. Éyi Nzambi, tùtùminèku Davidi udi mwa kumona mwaba wùdiye mwimane, udi mwa kutàngila ne kumona ne Nzambi mmwenze mulayi wà cìvwà, mwikalàYe mwa kucyènza leelu. Nzambi mmucyàmbè apa mene mu Dìyi Dyèndè, mùvwàYe mwa kucyènza.

¹⁴⁹ Nzambi wàkambila Miikà. Miikà wàkakenketa cikeena-kumona cyèndè kumpala kwa baprofeta nkama yinaayi bàvwàbo bapèèshe myànzu abu. Wàkakenketa cikeena-kumona cyèndè bwa kumona ní cìvwa cijaalàme. Wàkatàngila paanyima ku cìkaavwà muprofeta mwambe kumpala kwèndè yèyè, bwa kumona cyàkenzekà. Wàkatàngila paanyima, ne wàkamòna Eliyà awu mwimane kwàka, mwambe ne: “Aakàbà, wèwè pèèbè, mbwa neyilakè mashi ebe.” Mpindyewu, dîbà adi yèyè wàkamona ne cikeena-kumona aci cìvwa cìkùmbànàngàne anu menemene ne Dìyi dya Nzambi, ki kucìjikulayè. Nenu yèyè ùvwa mwambilemù. Cya bushuwa. Cìvwà bakwabo abu bambe nansha ciikàle cinyi, yèyè wàkashààla anu ne Dìyi adi.

¹⁵⁰ Mpindyewu tùtangilààyaaku cikeena-kumona citùdi naaci leelu eci. Nkwibaka kwa maekleeziya anyi; mbintu bipyabipyà anyi; mbintu binène byàlwà kwenzeka anyi? Anyi, ncilumbulwidi anyi? Tàngilàayi paanyima nùmonè mulayi wa leelu, nùmonè ne mmu muvù kaayi mutùdi ne mwoyi.

¹⁵¹ Wèwè udi wamba ne: “Ee, Nzambi àbeneshiibwè, mwaneetu, mèmè ndi ne meeji matòòke. Ndi mukashààle wa mu ekeleeziya. Ndi ne dipòlomè dyànyì dya bu-licencié. Ndi mwenze *cikampanda*. Abi mbîmpè, abi mbilenga, kakwèna bwalu nansha bumwe bùbèngangana ne aci to; ki mùvwà pèndè naabi Davidi, ki mùvwà kabidi baakwidi bàà mu dituku adi naabi, ki mùvwà

kabidi beena tèòlòjî abu naabi. Kadi's bìvwa bibèngàngàne ne Dîyî.

¹⁵² Nzambi mmwambe mùvwàYe mwa kucyèenza leelu, mùvwàYe mwa kwalujulula bintu byònsò, cìvwàYe mwa kwenza cyakabidi. Yèyè mmulaye bwa kwalujulula. Aci ncyà bushuwa menemene. Mu Yowèlà 2.28, Yèyè mmulaye ne Neààlujululè. “Mémè nèngààlujululè,” mùdì Mukalenge wàmba, “bidimu byònsò byàkadyàbo kùdì mukùmbì wà yelèkè.” Yôyî yìdì ne dî-... Nwamonu's, ncìshì anu cyôci cimwecimwe aci; cidi mu citùpà cya mwoyi cishiilàngàne. Nenku pààkabangà cyena Katolike kudya, pashiishe ba-Luthériens, ne ba-Méthodistes, ne beena Mpenta, ne bònsò, too ne kwinshi; Yèyè mmwambe ne: “Mémè nèngààlujulwilè Ekeleeziya bintu byònsò anu menemene mùvwà cyôci aci ku ntwaðijilu amu.”

¹⁵³ Tàngilàayi cikeena-kumona aci dilòòlò adi. Anu menemene Mukaji-musela umwèumwè uvwa mulwe *elu* luseke awu, ngudi mulwe *elu* luseke. Paanyima pàà ndumba ayi mimanè kupita mivwàle tulàmbà twabo twa tukese atu, tuntu twabo twa kale tùvwà tubànde mushindu *ewu* atu, ne biikàle bàja maja a bìdùndadùnda, kadi bàdibiikila mùdibò Ekeleeziya.

Wèwè udi wamba ne: “Ee, twètù katùtu twenza abi to.”

S'ki mùdì Nzambi ùnùmòna. Kí mmùdì udìmòna wèwè mwine amu to. Mmùdì Nzambi Yèyè ùkumòna. Muntu nansha umwe kàtu ùdìmòna yèyè mwine mu cilèma to. Paùdì utàngila mu lumwènù lwà Dîyî dya Nzambi, Dyòdì ndidì dìkwambila ne udi mu cilèma anyi to. Bu ne Davidi wàkenzakù cyôci aci, nunku's mmumone cilèma cyèndè. Bu Aakàbà mwenzèku cyôci aci, anyi bu baprofeta abu benzèku cyôci aci, nunku's mbamòne cilèma cyabo.

¹⁵⁴ Muprofeta mushindika ùvwa mwambe ne: “Aakàbà neàfwe, ne mbwa neyilakè mashi èndè.” Ne ciprofeta cyèndè cìvwà cikùmbànàngàne anu menemene naaCi. Dìbà adi kumanyaye ne ùvwa mu bulelela. Nansha Yèhoshàfàtà's bìvwa bikèngela kwikalaye mumone aci ne mucimanyè. Miiika pààkamònyaye cikeena-kumona aci, kàvwa ùtàmba kupetangana ne bantu bàà mu matuku awu to, kadi yèyè nguvwa ne EMU MMÙDÌ MUKALENGÈ WÀMBA. Yèyè nguvwa mu bulelela.

¹⁵⁵ Monaayi, tudi tulwa ne cintu eci mpindyewu mu dituku edi, patùdì tumona dìbà dya butumbi kutùdì tukafika eku.

Monaayi cìvwà Davidi ùteeta bwa kwenza, kabidi. Mvwa ne kaacintu kakese kafùnda mwab'ewu pa cyôci aci. Ùvwa ùteeta bwa kulwa ne mushèètè wà cipungidi mu nsesa ya Davidi, mu dingumba dyèndè sungasunga.

¹⁵⁶ Tàngilàayi paanyima kuntu kwàka pàvwà Mukalenge mwakule bwa musangu wà kumpala ku musulu eku ne: “Anu mùvwà Yone Mubàtiji mutùmibwe bwa kudyànjidila dilwa dya kumpala...”

Mwaneetu, beena mu Assemblées kabàvwakù bafwànyine kushààdila panyima to, nansha beena Unis, bôbò bônsò. Byàkakèngela bwa kwikalabo ne wa nanku mwaba kampanda. Aa, byàkakèngela bwa bôbò bônsò kucyènzabò, nwamonu's, anu menemene's. Byàkakèngela bwa bôbò bônsò kulwabo naaci ku nzubu wabò bôbò.

¹⁵⁷ Ûvwa muswe kulwa ne mushèètè awu ku nsesa ya Davidi. Bwa cinyi? Kakùvwa mwaba nansha wumwe muwùlongolwela to.

Nenku ki bwa cinyi kanwènakù mwa kutwàdila dingumba kampanda Mukenji to. Dìyì, Mushèètè wà cipungidi, Kilisto, “umwèumwè awu makeelela, leelu, too ne kashidi,” ne diDimanyishiibwa Dyèndè dyònsò, kwèna mwa kuDìtwàdila bulongolodi bweni to. Bôbò kabàakuDìitabuujakù to, bwalu kakwèna mwaba bwa Dyôdi adi to. Bible kí mmwambeku ne Yèyè ùvwa ùsanganyiibwa pambelu pàà ekeleeziya wa Cikondo cya Laodikiya, ùteeta bwa kubwela anyi?

Kakùvwa mwaba mu nsesa ya Davidi to, nansha mùvwa nsesa ayi ya lulamatu, ne bunene bùvwàyi abu, ne—ne bikwabo. Kacìvwa anu mwaba mwine to. Mushèètè awu wùvwa ne cya kwikala ku Yèlusàlèma. Ki kwàkayàwu pashìishe, pààkabàmbilà muprofeta cya dyenza naawu. Nwamonu anyi? Pa nanku bìvwa bikèngela bwa Davidi kulwaye naawu mu nsesa yèndè sungasunga. Kakùyi mwaba mulongolola bwàwù wôwò to.

¹⁵⁸ Kilisto ki wètù Mushèètè wà cipungidi, ne bôbò kí mbaswe kuWàkidila to. Kilisto ùdi Dìyì; bôbò kí mbaswe kuWàkidila to. Bôbò mbaswe twitabàayi wabò, dingumba dyabo, mushèètè wà cipungidi mupyamùpyà, anyi—anyi mwambudi mupyamùpyà. Bôbò mbaswe bwa dingumba diikalè diDyàmbùle; mushèètè wà cipungidi mupyamùpyà. Huh!

Vùlukàayi, Kilisto wètù Mushèètè wà cipungidi! Nudi nwitabuujà ne Kilisto ùdi Dìyì anyi? Nenku, kí Mushèètè wà cipungidi ngwôwò awu's. Ncya bushuwa anyi? Eyo. Kilisto kabeena mwa kuya Nendè, ku mwaba Wèndè mujaalàme, kùdi ditempu kampanda dya cyena-mangumba to. Yèyè ùdi ùyiikilangana ne muntu umwepele, kí nne cisùmbù. Kacya Yèyè kàtukù muiyikilàngàne ne cisùmbù to; muntu umwepele. Byôbì biine, Yèyè mmwambe ne Kààkwenza aci to. Yèyè mwenze nanku, s'Wènji bibèngàngàne ne Dìyì Dyèndè, Amòsà 3.7. Kwèna mwa kufikisha Dyôdi adi ku didinga nansha. To, mukalenge. Dìdi Bulelela.

¹⁵⁹ Kadi, nwamonu's, bôbò bàdi bàteeta. Mushèètè wà cipungidi kawèna mwa kwambwibwa kùdi bulongolodi kampanda to. Mùdi mitu mipitèpìte bùngì munda amu. Nwamonu anyi? Kacyèna mwa kwenjiibwakù to. Yèyè mmulaye ne Kààkucyènzà to, ne Kààkucyènzakù to. Yèyè mmwambe...pàdìbì ne

Yèyè wàkalaya—pàdibi ne Yèyè wàkalaya bwa kucyènza mu mushindu kampanda mukwabo? Ki bwa cinyi Yèyè mmulaye ne Kààkucyènzakù to.

Kanwikadikù nwela meeji awu to. Ndi mwa kuùmva. Nwamonu anyi?

¹⁶⁰ Pa nanku Yèyè—Yèyè mmulaye ne Neàcyènzè mu mushindu kampanda, ne cintu kanà cyònsò cya cibèngàngàne ne cyôci aci Yèyè kààkucyènzakù to. Nwamonu anyi? Kadi ku mushindu Wèndè wà ku cibangidilu, bilondèshile cidiYe mwambe mu Amòsà 3.7, ki mwàcyènzàYe. Ne aci cidi ne cya kushindikiibwa ne kujaadikiibwa ne ncyà bushuwa.

Mpindyewu, nudi bamanyè cidiYe mulaye leelu, dîbà adi's nyewu Ucyènza leelu. Cidi anu cyàkambaYe ne Neènzè aci. Úvwa ne cya kukangula Bitampi Mwandamutekete abi, ne byònsò bìvwàYe mwa kwenza abi; kubuulula maalu masokoka kuntwaku, mùvwà mabàtiiza aa ne bintu byònsò bibwejakàjiibwe. S'ki cyôci eci, mu Bwikadi Bwèndè mene. Maalu a mamanya's ngàà àcìjaadika. Maulu's ácyàmbi patòòke. Bantu biimàne, bacitàngile buludi, ne bàcìmòna cyènzeka. Kakwèna cintu nansha cimwe cidiYe mwambe cidiYe kàyi muvwije cilelela to. S'ki bwalu mbwòbù abu. Anu bwa nùmonè ne tudi penyì leelu.

¹⁶¹ Mushindu mwine wùdì muntu kanà yònsò udi ne Nyuma Wèndè, mucimanyè; mwikàle ne Nyuma wa Nzambi pambidi pèndè, mmumanye ne Eci m'Bulelela, bwalu Nyuma wa Nzambi kààkwakulakù bibèngàngàne ne Dìyì to. To, to. Yèyè neikalè anu menemene ne Dìyì.

Wèwè udi wamba ne: “Mémè's ndi ne Nyuma Mwîmpè. Nkààdi mwele mbila; nkààdi mwakule mu myakulu. Nkààdi muje maja mu Nyuma.” Abi kabyèna byùmvwija cintu nansha cimwe bwa Nzambi to. Nwamonu anyi?

Davidi's wàkenza cyôci cimwecimwe aci, pabwîpi ne cintu cimwecimwe aci, kwòkù aku. Wàkimba misambu ne bukole bwèndè bwònsò, ne kwelaye mbila ne bukole bwèndè bwònsò. Bakwabo bònsò abu bààkenza nanku, kadi's bàvwa bènda bàvwela buludi mu lufu. S'ncyà bushuwa. Aci kacyèna cìpetangana naaci to.

¹⁶² Dìyì ndidì ne mushinga, Dìyì dya Mukalenge. “Aba bàdi bìndilà Mukalenge.” Eyowa's, mukalenge. Nwamonu's, aba bàdi ne Nyuma wa Nzambi munda mwabo, bàdi bàtàngila mulayi bwa leelu, ne bàtàngila ne bìndila too ne pàdìbo bàCimòna. Dîbà adi bàdi bàmba ne: “Ki Cyôci aci.” Nzambi ùdi ùbàbuulwilaCì.

¹⁶³ Bu mùvwà Natànàèlè. Filipò wàkaya kasangana Natànàèlè. Natànàèlè kwambaye ne: “Mpindyewu anjì indilà kakese. Ndi mumanyè ne aci ncilayìibwe, kadi nCimòne's.” Nenku pààkaCimònàye, wàkamba ne: “Ki Cyôci aci.”

Mukaji awu kwambaye ne: “Mpindyewu, mèmè ndi mumanyè, nkàadi mutèèlèjètèèlèje beena tèlòlòjì bàà mishindu yònsò. Nkàadi mwenze *cikampanda* ne *cikansanga*. Ne nkàadi mubalè Bible, mèmè mwine, ne ndi mumanye ne tudi. . . Kùdi Maasiyà udi ulwa, wíkala mwa kwenza bintu ebi, pa nanku Wèwè ewu udi ne cya kwikala muprofeta Wendè.”

Yèyè ne: “Mèmè ki Yèyè awu.”

¹⁶⁴ Mukaji awu kwambaye ne: “Lwâyi, kanûmonàayi Muntu, ki Cyôci eci.” Wàkindila too ne pààkamônàye Maasiyà awu mumanyishiiḃwe ku Dìyì dya Nzambi, dîbà adi kwambaye ne: “Ki citùvwà bindile aci, kùkaadi bidimu nkama yinaayi. Katwèna bapetè muprofeta anyi nî ncinyi cyònsò to. S’ki Yèyè ewu, ne Yèyè mwine Udi wamba ne Udi Yèyè awu.” [Katupa kàa mukaba wà mēyì munda mutupu—Muf.] “. . . pàtukàayi nûmonè Muntu Udi mungambile bintu bîndi mwenze.”

Kadi baakwidi bôbò bàvwa bàswa kuMushebeya, ne ndekeelu wa byònsò bàakacyènza. Nwamonu anyi?

Kadi kabeena mwa kushebeya Nyuma Wendè leelu ewu nansha. Ncyà bushuwa. To, kabeena mwa kuMushebeya to. Ûvwa kaaba aka bwa kutùbweja, pa nanku tudi ne kusakidila. Monaayi mùdì Nzambi munene, byenzedi Byèndè mùdìbì binène, mùdìcì kacìyikù mwa kupangila!

¹⁶⁵ Mpindyewu, Nzambi ùdi ne mushindu mulongolola ne wà ku cibangidilu wà dyenza maalù, ne Yèyè kààdyàkucyènzakù bibèngàngàne ne cyôci aci to.

¹⁶⁶ Mpindyewu Yèyè mmulaye mu matuku a ndekeelu bìvwàYe mwa kwenza. Ne nCibitùme, citùtùmìne Mukenji; ne Mukenji ewu ùvwa mwa kwikala ne dimanyishiiḃwa dimwedimwe òvwà naadi Eliyà adi, mùvwà Elishà naadi, mùvwà Yone Mubàtiiji naadi amu. Ne Cìvwa mwa kukùdimuna myoyi ya bantu, kî nkuyitàngija ku dingumba to, kadi kuyààluja kùdi baataatù bàà ku cibangidilu, bapostolo, kuyààluja ku Dìyì. Mushindu mwine wùdì bintu ebi bishindika’s wè! Mushindu mwine wùdì mu dyela dya mpungi wa mwanjelo wa ndekeelu, Bwàkabuulwibwà 10: “Mu matuku a mwanjelo wa mwandamutekete, maalù masokoka aa àdì ònsò. . .”

“Ba-Méthodistes bààkenza *cikampanda*, ne ba-Baptistes, ne église de Christ, ne ba-Témoins de Jéhovah, bònsò bàdì bènza *cikansanga* bwa cinyi?”

“Maalu masokoka awu neàbuuludiibwè mu dituku dya ndekeelu, pìikalà wà mwanjelo wa mwandamutekete. . . Mukenji wà mwanjelo wa mwandamutekete, pìikalàye. . .” Kî mpààbangàye kwenza cyôci eci to, kadi: “Pààbangàye kukòbola Mukenji wèndè.” Nwamonu anyi? Kî mmu bidimu bya didìlongolola abi to, kadi: “Pààbangàye kukòbola Mukenji, maalù masokoka aa dîbà adi neàbuuludiibwè.” Kadi’s ngòwò aa; ncìvwa mubimanyè to, ne nwènù nudi bantemu bàà cyôci aci.

¹⁶⁷ Ne pashìishe mu nzubu munene wa dijoojela wàwa, bwa bàà pa buloba kabìikadi, bàcìdi anu bàdyèla nkonko pa cìdi cyenzèke. Mu Tucson, nzubu minene ya dijoojela ayi mmicìkwàte fòtò muulu mwàmwa; bàcìdi anu bàdyèla nkonko pa cìdi cyenzèke. “Ncinyi aci?” Bàcìdi anu bàfunda mu cikandakanda ne: “Kùdikù muntu udi mumanye cintu kampanda pa bwalu ebu, mùdici cìfwànyine kwikala cyenzèke anyi?” Kakùtu difwima muulu mwàmwa to, kamùtu kapeepà, kamùtu mutaleela to; mu butùmbùke bwa kilòmèètà makumi anaayi ne mwadamukulu mu mpeepele. Kaa, ekelekele!

“Nekwikalè bimanyinu mu dyulu lwà kuulu. Kadi pènzekà bintu ebi, dikanka dya buloba mu myaba mishiilèshiiàngàne, pashìishe nekùmwenekè cimanyinu mu dyulu, cya Mwànà wa muntu.” “Mu dituku adi,” mu Luukà, “Mwànà wa muntu nèàDìbuulùlè cyakabidi; munkaci mwa kubuuludiibwa, Yèyè mwine.” Ne buloba nebwikalè ne mmwènekèlu wa Sodomà ne Gomolà. Kaa, ekelekele!

Bànà beetu, kanùpangi kumanya bintu bya nyuma to, nwamonu's. “Kenketaayi Mifundu, bwalu mu Yòyi mmunùdi nwela meeji ne Cyendelele, ne nudi ne Mwoyi wà Cyendelele; kadi Yòyi ayi's ki Yìdi yìfila bujaadiki bwa Dìyi.” Yòyi ki Yìdi yìfila bujaadiki bwa Bulelela, bintu bìdi Nzambi munkaci mwa kwenza mu dībà edi abi.

¹⁶⁸ Kadi ncinyi mpindyewu? Aba bàdi ne Nyuma wa Nzambi, mbindile byòbì bintu ebi. Ne pàdìbo bàmona bintu abi, bàdi bìitabuuja bintu abi. Yesu wàkamba ne: “Muntu nansha umwe kèna mwa kulwa kùndi Mèmè pàdi Taatù Wanyi kàyi mumukòke to. Ne bònso bàdi Taatù muMpèèshe,” Yèyè ùdi Dìyi, “nebàlwe kùNdi. Nebàlwe kùNdi.”

¹⁶⁹ Ndi mutàmbe kwikala mukolèshe dīyì mu dinda emu, nwamonu's. Aba bàdi bindila Mukalenge, munkaci mwa kwindila; ne pàdìbo bìndila apu, ne bàmona mulayi wà leelu awu, munkaci mwa kushindikiiibwa, cìdi cìvwijulula diitabuuja dyabo dipyadipyà mu Dìyi Dyèndè. Bwalu, Yèyè mmulaye bwa kucyènza, kadi's ki kucyènzaYè eku. Dībà adi kakwèna mpatà to. Nzambi ùtu wàkula. Dìyi Dyèndè, dyambedi, dītu dyàkula. Ne pashìishe Nyuma udi uDitwàla awu ùdi wènza cintu cìdi Dìyi dyambe ne neDyènzè aci.

Kaa, tudi ne matentula búngì cyanàànà. Netùtungunukè anu ne kwikala naawu, bantu bàà myoyi ya meeji matòòke bàteeta bwa kwenza bintu mu mushindu *kampanda* ne mu mushindu *kansanga*, kadi tàngilàayi nùmonè cyàkenzekà aci. Bantu nebèlè byanza, ne dībà adi—dībà adi nebàfwe. Nwamonu's, monaayi.

¹⁷⁰ Cilukabatà cya dingumba cya muntu nansha cimwe kacyàkukùmbanàkù to, kuvwija kwa bidimba bwa mishèètè yabo ya cipungidi ya cyena-mangumba midikwàtakajila ayi.

Kacya Nzambi kâtukù ne dingumba to. Yêyè kààdyàkwikalaku ne dingumba to. Dyôdi diine's ncintu cikwàtakaja kùdi bantu.

¹⁷¹ Kadi ndi ndikonka, leelu ewu, byônsò byetu bya dikòka dya bantu ne bibilù binène bya butangadiki ne matàbuluja abi, ní katwèna baditwe mu dyuja dya mushèètè wà cipungidi wà ba-Méthodistes, mushèètè wà ba-Baptistes, mushèètè wà ba-Presbytériens! Kadi bishi bwa Mushèètè wà cipungidi wà Kilisto, Dîyi adi?

Ne piikalàbi bikèngela bwa Mukaji-musela ikalè Dîyi, dîbà adi's bìdi bikèngela bwa kwikalaYe wa Kilisto, citùpà cya Mubaki. Bìdi bikèngela bwa kwikalaYe Dîyi; Dîyi adi kadiyi dya dituku Dyèndè Yêyè to; Dîyi dya dituku edi, dyàkalayàYe ne nedìikalè dituku edi adi, didiYe mutùme Dîyi Dyèndè bwa kufwimba Mukaj'Èndè-musela ne kuMupèèsha mbùngakeenu. Ndi ntekemena ne tudi tucyùmvwà! Mpindyewu kwàngaci mmwènenu webè wèwè, ne kwàngaci mmwènenu wa muntu kampanda mukwabo to. Angata Dîyi dishindika edi, Bible. Dyôdi ndidi dyàmba.

Nzambi mmulaye mu Dîyi Dyèndè mushindu wùvwàYe mwa kusungula Mukaj'Èndè-musela mu dituku dya ndekeelu edi. Nukààvwakù bamanyè nanku anyi? Yêyè mmucilayè, mùvwàYe mwa kucyènzà, ne ciine aci ku ndongamu Wendè wa ku cibangidilu wa kusungula Kilisto, wa kusungula bikondo, kusungula mivù, mùdiYe. . . Yêyè kèna mwa kucipangila to, pa Mukaj'Èndè-musela, bwalu Yêyè ewu ùdi citùpà cya Dîyi.

Kèna mwa kuCisungwila ku dingumba to, bu mùvwàbi ne Kààkasungwila Kilisto ku dingumba. Kilisto wàkalwa kùdi dingumba anyi? Wàkalwila ku dingumba anyi? To. Bôbò bààkaMubènga. Ee, cyôci aci ki cìvwà dingumba dyenze musangu awu. Pashìshe pàdiYe ùsungula Mukaji-musela, Ùdi mwa kulwa mu mushindu mukwabo kanà wônsò anyi?

Yêyè wàkafikisha Kilisto pànu bishi? Ku Dîyi dya baprofeta. Ncya bushuwa anyi? Neàfikishè Mukaj'Èndè-musela pànu bishi? Ku Dîyi dya baprofeta.

Yêyè wàkaMumanyishisha bishi pààkalwàYe apu? Ku muntu mwikàle ne nyuma wa Eliyà pambidi pèndè, mupàtùkile mu cipèèla. Yêyè neàmanyishishè Mukaj'Èndè-musela bishi? Yêyè mmulaye mu Maalàki 4 cintu cimwecimwe aci, kumpala kwa kubùtulaYè buloba, mwàkadibi mu matuku a Sodomà.

¹⁷² Vùlukàayi ne, Sodomà wàkooshiibwa. Ncya bushuwa anyi? Ee, bikèngela buloba ebu bwòshiibwè. Yesu wàkamba nanku. Ne nekùlwe cikondo, cya ne, bu mùdi Luukà nshapita wa 17 ku mvensa wa 30 mwambe ne: "Mu matuku ikalàbu bushààle bu Sodomà ne Gomolà, dîbà adi Mwànà wa muntu ùvwà ne cya kubuuludiibwa."

Ne pashìshe ncinyi cìvwà mwa kwenzeka? Bilondèshile Maalàki, Yêyè neòshè cyakabidi buloba, ne baakàne (mu

Bukalenge bwa bidimu cinunu) nebâpatukè bènda bèndela pa butù bwa beena lwonji. Ncya bushuwa anyi? Nwamonu anyi?

Pa nanku tudi ku cikondo cya nshikidilu mene. Tudi basômbe mwab'ewu ku ciibi mpindyewu, bindile bwa kulwaYe.

¹⁷³ Monaayi ne, Nzambi mmulaye mu Dîyi Dyèndè ne Yèyè ùvwa mwa kusungula Mukaj'Èndè-musela ku mushindu Wèndè wà ku cibangidilu wâkasungulàYe Wèndè... Mubaki awu. Wâkadyànjlila kucyâmbila ku baprofeta, ne kutùmaYè muprofeta bwa kucimanyisha.

Muprofeta awu pàvwàye mwimàne ku mwelelu wà Yadènè, wâkamba ne: "Monaayi!"

Bòbò bàvwa bàmba ne: "Wèwè udi Maasiyà awu, kî mmwômò anyi?"

Yèyè ne: "To, mèmè ncyèna Maasiyà awu to."

"Wèwè udi ne cya kwikala anu Maasiyà awu."

¹⁷⁴ "Kadi mèmè ncyèna Yèyè awu to. Kadi Yèyè awu mmwimàne munkaci mwenu amu. Ne bisabaata Byèndè, mèmè ncyèna mukùmbànyîne kusùulula nshinga yàbì to. PàälwaYe, neàDimanyishè..."

Kadi leelu Yèyè mmwimàne munkaci mwetu emu, mu Mupersona wa Nyuma Mwîmpè, mutùngùnùke ne kuDimwènesha, ùbwela mu Ekeleeziya Wèndè, mwikàle ùDimanyisha; bwalu, Yèyè, ne Mukaji-musela ne Mubaki nebîikalè cintu cimwe, mwikàle ùDimanyisha. Ne dîngà dituku neùmônè ne Ewu ùvwà umvwa mu mwoyi webe, ne umòna dimanyishiibwa Dyèndè awu, neälwe muntu musungùlùke kumpala kwebe, dîbà adi wèwè ne Yèyè nudi Umwe.

Nudi basanga kùdì Dîyi. Ne Dîyi, òvwa ku cibangidilu adi, nedyàlukilè cyakabidi ku cibangidilu, didì Nzambi adi. "Ne mu dituku adi nenùmanyè ne Mèmè ndi munda mwa Taatù, Taatù munda Mwànyì; Mèmè munda mwenu, ne nwènù munda Mwànyì." Aleluuyah! Twâfikimu. Aleluuyah! Mèmè ndi ne disanka dyâbûngì dya kuMumonà wàngata mubidi wà buntu munkaci mwetu mene, ne dya kumona cyâkalayàYe bwa Dîyi; kaciyi cidì disaluka dya muntu kampanda, dimba dya misambu, ditùpika, ne dija dya maja to. Kadi ku Dîyi Dyèndè, amen, Yèyè ùdi ùDimanyisha.

¹⁷⁵ Tàngilàayi, pàakatwàlào, kwasabo ntempelu ne kulwamù ne mushèètè wà cipungidì awu, Nzambi's wâkabwelamù ne Dikunji dya Kapyà. Amen. Ùvwa n'Davidì ùtùpika, wèla mbila mikole, bàvwa mbimbi bônso bàà misambu ne baakwidi bènza bikàsà, pàvwàbo bapàtùke mu diswa dya Nzambi apu. Kadi pààkalwà Nzambi kumanyisha mushèètè wà cipungidi mu mwaba ne citèèkelu Cyèndè Yèyè, kumpala kwa kufikishabo mushèètè wà cipungidi awu muntwamu, s'ki Dikunji dya Kapyà dilwalwà dyènda dileeja njila edi, dipweka buludi kumutu kwa

mapwapwa a bakèlùbà, ne paanyima mene pàà Mwaba mutàmbe Cijila, ciikishilu Cyèndè; Dikunji dya Kapyà's! Ne butumbi bwa Nzambi bùvwa muntwamu, mu mushindu wà ne munt- . . . kabàvwa nansha mwa kumona mwa kukwàta mudimu to. Amen.

S'neCìfofomijè mèsù a mwena tèlòlòjì yònsò, pààvwilàYe Mukaj'Èndè-musela. Yèyè ewu neàngaciibwè muulu munkaci mwa—mwa bufuku, mutùdi mwa kwamba's, bwàbò bóbò. Kabàakumòna nansha pààvayè apu to. Kaa, butumbi bwikalè kùdi Nzambi's wè!

¹⁷⁶ Monaayi, Nzambi mmulaye ne Yèyè neàpatulè Mukaj'Èndè-musela, civwàYe mwa kwenza. Kùvwa mwa kwikala Dimiinu kampanda. Kùvwa mwa kwikala Bukènkè ku ibaaumulòòlò, mùvbwàYe mwa kwenza bintu byònsò ebi, anu mu byòbì, ne ku mushindu wàkacilongololàYe mu Dipungila Dikulukulu ne mu Dipungila Dipyadiya.

Ne kî nku dingumba nansha. Kî nkù ndongolwelu wetù utùdi tukwata nendè mudimu leelu ewu nansha. Twètù tudi tukeba anu lufu cyanààna. Bantu bàteekèPu anu byanza byabo, kadi bàfwe ku dyenza nanku. Nwamonu anyi?

¹⁷⁷ Dîyì, Mukenji wà dilòòlò, wùdi ne cya kutwàla bipeta bya dilòòlò. Mukenji wà dilòòlò wùdi ne cya kumyamina Dimiinu dya dilòòlò, kî ndimiinu dya mu dinda to. Dimiinu dya dilòòlò! Ncya bushuwa anyi? Cyalu cya mu nkànkala, mamiinu ààci musangu awu, àvwa ndingumba; dyàkafwà, dyàkabùtuka. Kadi Mukenji wà ibaaumulòòlò newùleejè Bukènkè bwa ibaaumulòòlò, newùleejè bipeta bya ibaaumulòòlò; Mukenji wà ibaaumulòòlò!

Cikondo cya Yesu, mukenji wà mu nkànkala, wàkaleeja bipeta bya mu nkànkala. Mukenji wà ku cibangidilu wàkaleeja bipeta bya ku cibangidilu, wàkenza bufùki. Yèyè wàkenza Mwan'Èndè mu cimfwànyì Cyèndè Yèyè mwine, mu nkànkala. Ku ibaaumulòòlò Yèyè ùdi wènza Mukaji-musela bwa Cyòci aci. Nwamonu anyi? Ku cinyi? Ku Dîyì Dyèndè.

Yèyè wàkenza buloba munyì? Mmunyì mwàkabwàkulàYe pààbù kwikalakù? Ku Dîyì Dyèndè!

Mwan'Èndè ùvwa nganyì? Dîyì! “Ku cibangidilu kwàkadi Dîyì, ne Dîyì dyàkadi ne Nzambi. Ne Dîyì dyàkavwijiibwa mubidi ne dyàkasòmbela munkaci mwetu.”

Mmunyì mwàngatàYe Mukaj'Èndè-musela? Ku Dîyì; kî nku ditempu dipyadiya to, kî nku mmwènenu wa mwena tèlòlòjì kampanda to. Kadi mbilondeshìle Dîyì Dyèndè mwàMumanyishàYe. Nenku kùsakididiKù kantu nansha kamwe anyi kùumushidiKù kantu to. Û'Dilekèlè anu mùdiDi amu. Nwamonu anyi?

¹⁷⁸ Ku ibaaumulòòlò, Yèyè mmulaye ne Ùvwa mwa kubuulula, nansha nanku, kukàngula Bitampi Mwandamutekete ebi ne kuleeja bìvwà ekeleeziya ayì mipangile musangu

awu. Bwàkabuulwibwà 10, ne Maalàki 4, Luukà 17.30, Yêyè mmwambe ne Ûvwa mwa kucyènza. Mpindyewu katùcibwejàkàjiku to. Tùcìlamàayi anu mushindu awu.

¹⁷⁹ Ngánjì, bwa kujikija... Tukaàdi twipacila, pabwîpì menemene ne dîbà dikumi ne ibidi kushàale tusunsa dikumi ne tutaanu. Njikijè, mu kwamba nunku.

Balunda bàanyi, tèèlajàayi, mu Dîna dya Mukalenge Yesu! Bintu ebi mbitàmbe kutòoka bwa kanùlu kupanga kuCìtabuuja to. Mbitàmbe kutòoka bwa kanùlu kupanga kuCìmòna to. Ncya bushuwa ne nudi mwa kumona Cyôci aci! Ncya bushuwa ne bàà pa buloba mbafwànyine kuCìmòna! Kadi anu wenù... .

Kanùpecikù bwenzeji bwa kùdì bilengejanganyi bipyabìpyà ne bintu bìdìbo naabi leelu ewu ebi to; muntu nansha yêyè mwîmpe bìshi, nansha yêyè ne meeji matòoke a bìshi. “Bòbò kabàyi bàakula bilondèshile mikenji ne baprofeta to,” mùdì Bible mwambe, “kakwènakù Mwoyi munda mwàbò to.” Nwamonu anyi?

¹⁸⁰ Davidi ùvwa wèla meeji ne ùvwa mu bulelela. S’ùvwa ne meeji matòoke. Baakwidi abu bàvwa bèèla meeji ne bàvwa mu bulelela. S’bàvwa ne meeji matòoke. Kadi bààkapanga anu kukonka Mukalenge pa bwalu abu. Ne bòbò bàvwa bafwànyine kwikala bacyènzè munyi? Pàmwàpa bàakamba ne: “Tudi basambile bafwilekù.” Kadi aci kacìvwa mushindu wà Nzambi wà kucyènza nansha. Yêyè mmulaye ne Kàvwa mwa kwenza cintu nansha cimwe Kàyi mwanji kuCìbuulwila dyambedi basadidi Bèndè baprofeta to. Kadi’s nyawu kùvwa Natànàèlè mwimane munkaci mwabo mene amu, kadi kabàakamukonkakù to nansha kakese.

¹⁸¹ Mpindyewu nùbalàayi ndambu wa nshapita ya Kulondolola yidi yilondà ayi, nenku nenùjandulè. Davidi pàakasòmbàye mu nzubu mwèndè, ne kwambaye ne: “Mbîmpè anyi,” ne Natànàèlè ùvwa musòmbè nendè, “bwa mèmè ewu, kwikala musòmbèle mu cèdres, pàdì—pàdì mushèètè wà cipungidi wà Nzambi mu ntentà pambelu apa?” Nenku Natànàèlè, kupetaye kùdì Mukalenge, cya dimwambila bwa kwenzaye.

¹⁸² Kadi yêyè ùkaavwa mumane kwenza cilèma, ki pashiishe Nzambi kwamba ne: “Ambila musadidi Wanyi Davidi ne Mèmè ndi mumunange. Ndi mumupè dîna bu dya bantu banene bàà pa buloba, kadi Ncyèna mwa kumulekela ùcyènza to,” nwamonu’s, “yêyè mmumane kuNgeela màyi ku makàsà,” wamonu’s, “Ncyènà mwa kumulekela ùcyènza to. Nèntwalè muntu, mwanèndè wa balume, yêyè neàjuulè nzubu wa kashidi wa Nzambi.” Nenku awu ùvwa n’Davidi’s, mu bushuwa bwa bwalu. Bidi ne, Solòmò ùvwa cifwanyikijilu cya cyôci aci, kadi pashiishe yêyè wàkapangila. Muntu yònsò ùdi ne cya kupangila. Muntu wetu yònsò ewu ùdi ne cya kupangila.

Nzambi ki Umwepele udi kàyi mwa kupangilakù to. Yèyè kèna mwa kupangila to. Aci ki cintu cimwepele cidi Nzambi kàyikù mwa kwenza to, nkupangila. Ne Nzambi ùdi Dîyì. Ne Dîyì, nansha bimwèka bu ne cintu necilwilè njila mukwabo ewu, necilwilè anu menemene njila udi Dîyì dyambe awu.

¹⁸³ Mpindyewu vùlukàayi ne, bidi bikèngela ùlondè muvù, dîbà. Nwamonu anyi? Ne muvù wùdi usanganyibwamù, dîbà, enza bwa aci cishindikiibwè, bwa kumona ne cidi menemene anu Bulelela.

¹⁸⁴ Mpindyewu angàta bintu byònsò bidì ne cya kwenjiibwa ebi, Dîyì dyònsò, bifwànyikijilu byònsò, ne bintu abi, ùtangilè mwaba wùdi usanganyibwa. Elàngànaayi meeji pa dîbà ditùdi ne mwoyi.

Tàngilàayi kuntu kwàka, pamwe ne cyàdiikumi cimwe cya buloba aci cidi pabwìpi ne kutùkina mu màyi. Maalu a mamanya ngàdi àmba nanku. Bàdi bàtàngila ku ntankù. Kùkaadi ndambu wa bidimu, bàvwa bambe ne: “Nkushààle anu tusunsa tusatu cyanàànà mpindyewu bwa mundankulu.” Ncifwànyine kwikala kasunsa kamwe, ncifwànyine kwikala cyabibidi cimwe cya kasunsa patùdi twakulangana apa.

Kwambabo ne: “Kacyàkwenzeka mu lwetu lukòngò elu to.”

¹⁸⁵ “Ncifwànyine kwenzeka mu tusunsa tutaanu emu.” Kadi monaayi cintu cyàkalondà cyàkambàye: “Bidimu bitaanu.” Mpindyewu awu kî mmèmè udikù mwambe aci to. Yèyè ngudi mwambe nanku, yèyè mwena maalu a mamanya awu. Ki kumwangalabo mu Californie eku byenzè bu njiji. Nwamonu anyi? Ee, dituku dyàkapàtukà Lotà mu Sodomà, dituku dimwedimwe adi kwàkalòka mvula wa kapyà pa buloba.

Dimwe dya ku matuku àdi panshi aa Nzambi neàngatè Mukenji wètù ewu, ne twètù netùùmukè pànu. Cintu kampanda ncyènzekè, cya bushuwa menemene, dîbà adi, piikalà Ekeleeziya muye, Mubidi Wèndè, Mukaj’Èndè-musela.

¹⁸⁶ Mpindyewu ndi muswe kunùbadilakù Mufùndù kampanda, ne ndi muswe nùWùbalèku pamwe naanyi. Ndi muswe nùbuululè mu Dutèlònòmà 4, bwa kujikija. Ngeela meeji ne pàmwàpa bintu búngi bukùmbàne mbimane kwambiibwa, bwa nwamòna mwa kuumvwa. Dutèlònòmà 4. Nèmbalè myaba yibidi mwômò emu.

Nenku bwa ekeleeziya ewu, ne bwa batèèleji bàà mikaba ya mêyi, bantu bàdi batèèjè mikaba, ne bantu bàdi batèèlejila ku nshinga mu bitùpà bikwabo byònsò bya ditunga, ndi muswe bwa nùteelejè cyôci eci ne ntema yònsò, ne kanùpangidikù to. Eci ki cintu cindì . . .

Dutèlònòmà, nshapita mwi4. Nèngàngatè mvensa wa kumpala. Ndi muswe kubala mvensa wa kumpala, pashiishe nèmbalè mvensa wa 25 ne wa 26. Nudi mwa kucibala cyònsò

panwikalà bafikè kumbelu; kadi ng'anu, mbwa kulaminyinakù dībā, bwa twamònakù mwa kupátuka pa dībā, bwalu bìdi binkèngela bwa mèmè kwàlukilè cyakabidi dilòlòlò edi, bu Mukalenge mwa kwanyisha. Tèèlejääyi muprofeta ewu mùdiye wàkula. Úkaavwa mu Bwikadi bwa Nzambi. Yèyè ùvwa mumanye ciwâyè wàmba aci. Tèèlejääyi.

Mpindyewu ki bwa cinyi tèèlejà, Wèwè Izaleela, mèyi ne mikandu, bìndi nkulongesha, bwa wèwè kubyènza, bwa nwènù kwikala ne mwoyi, ne kubwela ne kukwàta buloba bùdi MUKALENGE Nzambi wa baataatù beenu ùnùpèèsha; (Aci ncifwànyikijilu cya Bukalenge bwetu bwa bidimu cinunu.)

Kanùsàkididi ku dîyi dîndi nnùfùndila, anyi nwènù kanùùmushidikù kantu to. ("KanùsàkididiKù kantu nansha kàmwe, ne kanùùmushidiKù kantu nansha kàmwe to. Shààlaayi, ambàayi anu cidiCi cyàmba aci!") bwa nwamòna mwa kulama mèyi matùma a MUKALENGE Nzambi wenù àndi nnùfùndila:

Mèsù enu àmònu cidi MUKALENGE mwenzè... kùdi Baalà-peòlà aci, bwalu bantu bònso bàvwà balondè Baalà-peòlà abu, MUKALENGE Nzambi webè wàbàbutulu munkaci mwenu. ("Mpindyewu nudi cisambà citàpùlùke, pambelu pàa mangumba awu." Nwamonu anyi? Nwamonu anyi?)

Kadi nwènù bàdi bashààle balamàte kùdi MUKALENGE Nzambi wenù abu, nwènù nudi ne mwoyi muntu ne muntu wa kunùdi leelu ewu. ("Kanwènakù bafwè ne dingumba dyenu to. Nudi ne mwoyi mpindyewu, ne mu Bwikadi bwa Nzambi.")

Ikàlaayi ne ntema, eci kacinùpici to. Mvensa wa 25, mpindyewu, pàdibo bàbwela mu buloba amu, mpindyewu tàngilàayi nùmonè cidi cyenzèke.

Nenku pawàlèlè bânà, ne bânà bàà bânà beebe, ne nwènù... bashààle ntàntà mule mu buloba amu, ne badikooyishe (s'ki cyàkenzekà), ne benzè... bimfwànyi bisonga (cintu kampanda ckwabo), anyi cya mu cifwànyikiji cya cintu kanà cyònsò, ne nwènù benze bubi ku mèsù kwa MUKALENGE Nzambi webè, bwa kumukeba ciiji, (Tèèlejääyi!)

Ndi ngangata maulu ne buloba bu bantemu bwa kunùpiisha leelu ewu ne, nwamonu's, nwènù nenùbutukè anu butùbutù ne lukasa lwònsò mu buloba abu, anyi mu mwaba awu, munùdi nuya bwa kakwàta dyàmwàmwà dya Yadènè abu; kanwàkuleepeshamù matuku enu to, kadi nwènù nenùbutudiibwè anu butùbutù.

¹⁸⁷ Ewu ùvwà m'Môsà wàkula ne Izaleela, paanyima pàà yêyè mumane kushindikiibwa kùdì Nzambi, ku Dikunji dya Kapyà, ne mumanye ne ùvwà mujaadikiibwe ne mmusadidi wa Nzambi bwa kubalombola bwa kupatukabo. Nenku kumpala kwa kubwelabo mu buloba abu, kumpala kwa kubwelabo, Mòsà wàkamba ne: “Mpindyewu, mēyi āngānwāmbidì awu, ndi ngangata dyulu ne buloba bu bantemu bwa kunùpiisha. Nwēnù basàkìdileKù kantu nansha kāmwe, anyi buumùshileKù Dìyì nansha dimwe, kanwàkushàalakù mu buloba bùdì Mukalenge Nzambi ùnùpèèsha abu to.”

Ki mündì ngamba pàanyi, mu Dìnà dya Yesu Kilisto: Kanùsàkididì kantu to, kanwàngaci, kanwèdìMù meeji enu nwēnù to, ambàayi anu cìdì cyamba pa mikaba ya mēyi ayi, enzàayi anu menemene cìdì Mukalenge Nzambi mutùme dīyì bwa kwenza aci, kanùsàkididìKù kantu to.

¹⁸⁸ Yēyè misangu yònsò, ùtu anu ùshààla mukwate ku mulayi Wendè kutùdì. Mulayi wònsò wùkaadiYe mwenzè, Ùtu mushààle mukwàtekù. Yēyè ùkaadikù munwāmbile bwalu bùvwà mwa kwenzeka, ne bwòbò bwenzèke anyi? Ndi ndwa ne dyulu ne buloba kumpala kwenu leelu ewu, mu kadyòmbò keela: Kacya Nzambi ùkaadikù mwambe bwalu bùdìYe kàyi mukùmbajè ne mwenzè anu menemene cìdìYe mwambe ne Ùvwà mwa kutwēnzela anyi? Yēyè kàtukù mucyēnzè anu mùvwàYe mwambe ne Ùvwà mwa kucyēnza anyi? Aci's mmenemene. Ki mwàtùngunukàYe ne kucyēnza. Cibi kanùKùsàkididì to. KanùKùmùshidì to. NùCitàbùùjaayi anu cyanààna ne nwèndè badipwekèshe kumpala kwa Mukalenge Nzambi wenù, bwalu twàseemēnyì pabwìpi ne diya kabwela mu Buloba abu.

Dìbà adi, kwàkwàlukila, kwàkwàlukila cyakabidi ku mwoyi wà mushindu ewu to. Newàlukilè bu muntu udi kàyi ufwa to. Newàlukilè, piikalà mpekaatu muumùshiiibwe, piikalà Sàtaanà muswikiibwe, ne munda mwa bidimu cinunu newikalè ne mwoyi pa buloba ebu bùdì Mukalenge Nzambi webè mukupèèshe. “Bwalu bapòle nebàpyanè buloba.” “Wa dyakalenga ngewu udi wenza mēyi Èndè matùma ònsò, bwa wàmòna mwa kupeta bukenji bwa kubwela mu Cimenga.” “Bwalu pambelu pàdì beena buloji, beena mashimi, bendi bàà ne bandumba, ne mbwa. Bòbò kabàakubwelamù to.” Kadi bìdì anu bwa Bapikula, ne bwa aba bàdì bènda mu mēyi Èndè matùma.

¹⁸⁹ Kwàngacikù cintu kampanda cya cipyacipyà to. Bìdì bipèèpuka myaba yònsò, ne nekùlwe kabidi bikwabo byàbùngì. Kadi kwàngaci bintu bipyabìpyà ebi to.

Mukalenge Nzambi webè wàkwambidì cìdì Bulelela. Mukalenge Nzambi webè wàshindiki cìdì Bulelela, ku Dìyì Dyèndè ne ku Nyuma Wendè. “Kî nku bukole, kî nku makàndà, kadi nku Nyuma Wanyì.” Nenku, Nyuma: “Nzambi ùdì wènda ùkèbangana ne aba bàdì bàMukuukwila mu Nyuma ne mu

Bulelele.” “Díyì Dyebe m’Bulelela.” Ne Yéyè wáshindikì mu kaabujimà ne Yesu Kilisto ùdi umwèumwè awu makeelela, leelu, too ne kashidi. Yéyè wákuleeji Mamiinu a dilòòlò. WákubuwidìWu, mu Díyì. WákujaadikìdìWu, ku Nyuma Wendè.

¹⁹⁰ Kùjuulukù anyì kùteecikù bulongolodi nansha. Kùteecikù bwa kwibakila pa ní ncinyì ní ncinyì cikwabo to.

Kadi shààla mudipwekèshe kumpala kwa Mukalenge Nzambi webè, bwalu mbimwèke anu bu ne biibi bidi mwa kukanguka bwa twètù kubwela mu Buloba bulaya abidi àdi panshi aa. Dìbà adi tùbwelèmu twenda twimba misambu milelela ne dicyònkomoka, pàngàta Mukaji-musela ne Mubaki kaaba kààbò ku Nkwasa wa butumbi.

¹⁹¹ Ikàlà ne nsòmbelu wa didipwekesha. Ikàlà ne nsòmbelu wa dinanga. Nùnganganè muntu ne mukwendè. Kanùpecikù bwalu munkaci mwenu to. Wèwè mumone cintu kampanda cya cibi cijuuka mu mwoyi wèbè bwa muntu mukwabo, cyùmùshèmu anu mwaba awu. Kùlekedì . . .

Ne Sàtaana neénzè ne mwèndè mwònsò bwa kubwela munkaci mwenu. Nwamonu anyì? Kanùlekedì aci cyènzeka to. Muntu kampanda wa làbàlàbà mmufwànyine kulwa ne kuteeta bwa kukulalula wèwè kuya kule naaCi. Nudikù nwela meeji ne bàvwa mwa kuumusha Mòsà mu Bwikadi bwa Nzambi ku miyiiki, mùkaavwàye mwimanèèmàne ne muCimònèmòne amu anyì? To, mukalenge. To. Katwèna tuumushilaKù anyì tusàkidilaKù to. NùCilamààyi anu mùdì Mukalenge mwambe amu. Katwènakù baswè bya dingumba abi to. Katwènakù baswè bya malongolodi abi to. Katwènakù baswè budimu to. Katwènakù baswè bya dikokangana to. Tudi baswè Nzambi, ne Yéyè ùdi Díyì.

Mpindyewu twìnyikààyaaku mitu yetu.

¹⁹² Éyì Nzambi, ndi ntàngila nseke yònsò ne dísù dya nyuma, ndi nteeta kumona cìdì munkaci mwa kwenzeka. Ndi mmona Díyì Dyebe, mùdìDi dishindikìibwe, mùdìDi dijaadikìibwe; kacya anu kùkaadi bidimu makumi asatu ne bisatu, ku musulu eku, ciWakambà aci. Kadi’s ki cyòci eci, bidimu makumi asatu ne bisatu pashìshe, ne Wèwè ùdi munkaci mwa kwenza anu cyŪvwà mwambe. Ne Ūdi mwenzè anu cyŪvwà mwambe. Mukalenge, kabitwènzèkèdiku bwa kuteeta kuCìvwija citàmbe bukesa anyì kuteeta kuCìvwija citàmbe bunene to; tùCilamè anu mùdì Wèwè muCyènzè amu, twenda anu badipwekèshe ne tuKulonda munyima.

¹⁹³ Aba, Mukalenge, mbaùdi Wèwè mufile ku mudimu wà bwambi ewu, pa kuumusha bònsò bàdì balààle mu ditunga dijimà abu, pa buloba bujimà. Nkita ya muneemu emu mmilame bààbúngì bàdì bindile, bansantu babèneshìibwe abu. Kadi bìdi anu mùdìbi byambiibwe ne: “Twètù bàdì ne mwoyi ne bashààle

katwàkupangisha aba bàdi balààle to. Mpungi neàdilè, bafwè nebàjuukè dyambedi; pashìishe netwàngaciibwè muulu pamwe naabo.” Pìikalà butumbi bwa Nzambi pa buloba, nebùsokokè Ekeleeziya ku mèsù kwa bàà pa buloba. KabààkuMumòna mene to pàayàYe.

¹⁹⁴ Taatù Nzambi, lamàku aba nunku mu byanza Byebe. M’Beebe Wèwè. Ndi ndòmba, Nzambi, bwa twikalèku misangu yònsò anu twenda badipwekèshe kumpala Kwebe. Katwèna bamanyè ne ntoo ne ku dîbà kaayi to. Katwèna tujinga kumanya ne ntoo ne ku dîbà kaayi to; aci kî ncitùtàngile twètù to. NciKutàngile Wèwè. Kî ndiswa dyetu twètù dya kumanya ne neUlwe dîbà kaayi to. Ndiswa dyetu, Mukalenge, dya kutúngunuka ne kwikala badipwekèshe too ne piine paWàlwa apu, ne kwenda Neebe. Ndiyinga dyetu dya Wèwè kuDilekela anu umanyika, ku musangu ne ku musangu, Taatù, munkaci mwetu, bwa twikalèku mwa kumona ne tucidi anu twenda Neebe.

¹⁹⁵ Tùfwilèku luse ku mpekaatu yetu yikaadi mipite. Tùludikèku ne tùlamèku ku buteyi bwònsò bwa dyabulu, bwa matuku àcilwalwà. Tùlombòlèku ne tùludikèku, Éyi Nzambi Taatù wetù. Tùfwilèku luse ku mpekaatu yetu ne tükwàcìshèku bwa kwikala bàna Beebe. Twètù tudi cipidi cya bantu bapele. Tudi bantu biipata, kùdi tusùmbù twa bantu tusungùlùke twa bàà pa buloba ebu, kùdi mangumba a maekeleeziya.

Tudi tumona ndekeelu. Ne tudi tuKwela twasakidila bwa lumònò lwa nyuma mu Dìyì Dyebe, bwa kumònakù cikondo cya nshìikidilu, bwalu bintu byònsò ebi bidi ne cya kuya kwobeka ku dyashiibwa dya mabwe dya dífùmina mu Dyulu. Tükwàcìshèku, Mukalenge, bwa katwikadi panwapa mu dituku adi to, kadi twikalè bakabwelè mu Bwikadi Bwebe, tupaapalè tükabwelè mu cyàdi Cyebe.

¹⁹⁶ Ondòpàku babeedi ne beena ntatu, Mukalenge. Tudi tulòmba ne dilòòlò edi Ùtùpèèshèku disangisha dilenga dya menemene, swaku bwa kakwikadi muntu ne butekete munkaci mwetu to, bwa Bwikadi Bwebe, Mukalenge. Swaku bwa myoyi yetu yitungunukè anu ne kwikala mitèèka pa Wèwè. Ne tudi bamanye, Mukalenge, bwa ne mfranga, babanji, bintu bya pa buloba kabyèna ne mushinga to, bìdi anu bya ntàntà mwîpì cyanàànà. Byònsò abi bidi ne cya kuya. Midimu yetu ya dyenza, mbànza yetu, balunda beetu, byònsò bidi ne cya kuya. Nansha twètù biikàle babanji, nansha biikàle bapele, nansha biikàle bamanyike anyì katùyi bamanyike, byònsò abi bìdi ne cya kuya. Kadi kùdi cintu anu cimwepele cidi buumùntù bwetu bushìndàmèene pànu, ki Yesu Kilisto. Pa nanku, Nzambi, enzàku bwa tuteekè ku luseke byònsò bu ne mbya mushinga mulondèle, ne tùmukwàtè Yèyè. Ne Yèyè ùdi Dìyì. Enzàku nanku, Mukalenge.

¹⁹⁷ Dìyì dishìndika dya dîbà! Dìyì dishìndika dya matuku a

Môsà òwva n'Yesu. Dìyì dishindika dya dituku dya Yeshààyì, Eliyà, Yone, bònso abu, òwva n'Yesu. Ne Dìyì dishindika leelu n'Yesu, umwèumwè awu makeelela, leelu, too ne kashidi. Tùkwàcishèku, Mukalenge, bwa kwitabuuja cyòci aci, kumona cyòci aci, ne kwendelamu. Tudi—tudi tulòmba mu Dìna dya Yesu.

¹⁹⁸ Ne mitu yetu miinyika, ndi ndikonka ní kùdikù muntu mwaba ewu utu kacya mu bulela kàyikù mwanjì kwenza cya cinène, cidi cikumbane mu byònsò... Wèwè udi uCìitabuuja, kadi anu kuCìitabuuja cyanaàna kì nkukumbàne to.

Mèmè ndi ngiitabuuja ne mukàjàànyì ùwva nsongàakàjì mwimpè. Mwva mumanye tatwèndè, mumanye mamwèndè. Mwva mumumanye bidimu ne bidimu. Úwva ne nsòmbelu mululàme. Ndi ngiitabuuja ne ùwva mukaji mwimpè, kadi aci kacivva cyènzà ne ikalè wanyì to. Yèyè kàakalwakù wanyì to, yèyè, too ne pàngàakalwà kumwitaba, yèyè kungiitaba.

Mpindyewu Yesu mmuswe kukwitaba. Kwènàku muswe kuMwitaba ne kulwa citùpà cya Dìyì Dyèndè anyì? Pawikalà kùyì mwanjì kwenza nanku to, ne mitu yenu miinyika, ne myoyi yenu miinyika, ndi mutwìshibwe...

¹⁹⁹ Kakwènàkù mwaba apa bwa dibìikila dya ku cyoshelu to. Mèmè ncitu mutàmbe kubìswa to, mèmè mwine. Ndi ngiitabuuja ne Nzambi ùdi ùlwa kùdi anu mwaba wùdi awu. Udikù mwa kwela cyanza muulu, wamba ne: “Mwaneetu Branham, wamvùlukakù mu disambila. Ndi muswe kwenza nanku” anyì? Nzambi àkubènèshè. “Ndi...” Nzambi àkubènèshè. Ekelekele, byanza myaba yònsò! “Ndi muswe kwikala nanku.” Nzambi àkubènèshè, mwaneetu wa balume. Àkubènèshè, mwaneetu wa balume; nwènù bònso, myaba yònsò. “Ndi muswe kwikala nanku.” Nzambi àbeneshè... “Ndi cya bushuwa muswe kwikala nanku. Ndi—ndi ncimòna.”

Ee, mpindyewu, tàngilà, wèwè mulunda wanyì, kùdi mwa kwikala kaacintu kampanda kakese... Pawikalà kùyì nanku to, nanku kùdi cintu kampanda cyùdi mushindàmèène pa kuumusha aci. Udi pabwìpì naaci, udi munkaci mwa kucitàngila. Udi mucimòne. Utu ucimòna kùkaadi bidimu, cibànda. Udi ucimòna ciikàle cilwa cibobè mpindyewu. Cyòci ne mushinga wàbùngì bwetu twètù, ne cintu nansha cimwe kaciyi mwa kunenga pa kuumusha Cyòci aci, bwa cinyì kubènga kuumusha anu mpala ku cintu cyùdi utàngila aci bwa kudishindamijila pa Yèyè? Bwalu, mpwilààmambò wa mwoyi wònsò, bikondo byònsò bìcilwalwà, n'Yèyè. Kwènàku mwa kucyènzà, patùdi tusambila pamwe apa anyì?

²⁰⁰ Nzambi munanga, pàdi byanza bya balume, bakaji, bàna bàà balume, bàna bàà bakaji, ne bambi mene, pàdibo beelè byanza muulu apa. Bàvwa—bàvwa bàswa kwa—kwamba ne mbaswe kulwa bashindamijila pa Mukalenge Yesu, kadi bimwèka bu

ne kabèèna mwa kucyènza to. Kùdi cintu kampanda ciikàle cibàkòka mu mushindu *kampanda*, mu mushindu *kansanga*. Ncifwànyine kwikala dingumba kampanda, ncifwànyine kwikala muntu kampanda, ncifwànyine kwikala mpekaatu kampanda, ncifwànyine kwikala cintu kampanda cidìbo bàsokoka mu mwoyi wàbò. Mémè ncyèna mumanye to, Mukalenge. Wèwè ngudi mumanye. Nansha ciikàle cinyi, swàku mpindyewu mene, Mukalenge, paŬdì ubiikila bakwabo apu. . . Wèwe ukàadi mumane kubàbiikila bôbò. Mbeebe Wèwè.

Nenku paŬcidì ubàbiikila apu, swaku bàsuuluke ku cyôci aci, mpekaatu udi mubàjingile awu, mùdi Bible mwambe. “Tàpulukàayi ne mpekaatu udi utùjingila bipeepele nunku awu, bwa twamòna mwa kunyeema ne lutuulu lwònsò lubilu lùdi lutùtèekela kumpala kwetu, mèsù matàngija (ku cinyi? ku mudimu wètù wà dyenza anyi? ku dingumba dyetu anyi? ku diswikakana dyetu anyi? ku nsangilu anyi?) kùdi Kilisto Mubangi ne Mujikiji wa diitabuuja ditùdi naadi mu Yèyè.” Enzàku nanku, Taatù, bwetu twètù leelu ewu, bwalu tudi tulòmba nunku mu Dìna Dyèndè ne bwa butumbi Bwèndè.

²⁰¹ Mpindyewu mBeebe Wèwè, Mukalenge. Enzàaku naabo mùdi Wèwè umòna ne mbikùmbàne amu. Enzàaku neetu mùdi Wèwè umòna ne mbikùmbàne amu. Twètù tudi Beebe. Mu Dìna dya Yesu. Amen.

Ndi muMunange, ndi muMunange
Bwalu Yèyè wàkannanga kumpala
Ne wàkampetela lupandu
Pa mucì wà Kalvariyo.

²⁰² Nwapùku mwoyi didya dya mundaamuunyà anyi? Nwapùku mwoyi bwa ne bânà ní bàdi bilenga, pambelu pààpa mu kàshinyi, anyi kabèèna bilenga anyi? Nwapùku mwoyi byònsò bikaadi bipite abi, ne bafikè ku dijingulula cinùdi nuumvwa mpindyewu mene aci anyi? Cidi cidìvwija cintu cya mubidi kumpala kwebe, ku dituku ne ku dituku. Nwamonu anyi? Aci ciikalèku mpwilààmàmbò wa cyònsò cidiku. Bikwabo bintu abi byùmukèku biye; byòbi nebìbutukè, byòbi biine.

Kaa, wèwè tùngunukà anu ne kuMulonda Yèyè! Nwamonu anyi? Anu mùvwà Elishà wènda ùlonda Eliyà amu, twètù twikalàayi tuMulonda Yèyè. Bwalu tudi ne cya kwangaciibwa muulu, twètù pèètù, dīngà dituku. Tudi bamòne dikalu dya Kapyà dyàkaMupàtulà Yèyè mu lukita adi. Tudi tuCyùmvwà munkaci mwetu mpindyewu. Dīngà dituku yèyè neàsүүлүлүлү tubalu atu ku bisuku. Netùbandè. Kanwènaayikù baMunange anyi?

Ne wàkampetela lupandu
Pa mucì wà Kalvariyo.

Kaa, wèwè kwènàku anu mwa kubwita kwìsù ne kuMumona mukùdika kuntu kwàka anyi?

Ndi muMunange, (Nganyì mukwabo ûndiku
mufwànyine kunanga's?) Ndi muMunange
Bwalu yêyê wàkannanga kumpala
Ne wàkampetela lupandu
Pa mucu wà Kalvariyo.

²⁰³ Musangu wònsò wûndi ngaalukila kwànyì kumbelu, ndi nsangana ne muntu kampanda mmuyè. Ndi mwa kwikala muye munda mwa ndambu wa ngondo, dya ngaalukila, muntu kampanda mmuyè. Ntu anu ngumvwa dibungama musangu wònsò wûndi ndwa.

Dituku adi, mwânà wa balume utùvwà tuyakù nendè mu kalaasa, pâmvwà ngenda mpweka ne musèèsù, kwambaye ne: "Wetwawu, Billy."

²⁰⁴ Mêmè kumutàngila, kale wàwa yêyê ùvwa mwânà mukese mulenga kwisù, ne nsuki mifiike ya yibàlakana menemene myela cisàku mitùma paanyima; patùdi twakulangana apa mmitòoke anu bu nêjè. Kale wàwa yêyê ùvwa wènda mululàme menemene; mpindyawu ne difù ditùma kumpala mushindu *ewu*. Mêmè kwamba ne: "Wetwawu, Jim." Mêmè kumutàngila.

Mêmè kudyumvwa mu mwoyi wànyì, kudyàmbidila ne: "Nzambi, mêmè ne nsongaàlùmè awu, mêmè ne muntu awu, s'tudi bàà bukole bumwe."

Dibà adi, ndi mumanye ne matuku àànyì mmabala. Ndi mumanye ne kakwèna mwa kwikala kabidi ntàntà mupitèpìte bule to. Ndi nkènzakana, ndyàmbidila ne: "Cìndi mwa kwenza ncinyi, Mukalenge? Ngambùlwishèku. Ncyèna muswe kuya kumpala Kwebe to. Ndi muswe kushààla anu—anu paanyima peebe Wêwê. Wêwê lombòla njila." Ndi ntàngila, ndyàmbidila ne: "Ne bidimu makumi ataanu ne bisambombo, kaa, ekelekele, kakwèna mwa kwikala kabidi ntàntà to!"

²⁰⁵ Dya mpwekesha mèsù, mmòna mulunda wanyì Bill Dauch musòmbè pààpa, ne bidimu makumi mwandamutekete ne bibidi anyì makumi mwandamutekete ne bisatu. Nkènzakana, mmòna bàna aba, bèèla meeji ne: "Ee, mêmè nèngìndilè too ne pàndi mfika bukole bumwe ne Mwaneetu Branham, kadi nshiishè kwela awu meeji." Wêwê munanga wanyì, bidi mwa kwenzeka ne kùyiku mwa kumona ciine aci to. Ndi ngeela mpatà bikole menemene ne nèucimòne. Wamònu anyì? Kadi, ela anu meeji ne, bu Mwaneetu Bill Dauch mwa kwikala ne mwoyi kupicisha dituku edi, yêyê neàlaale kupita bantu nkama bàà bidimu dikumi ne bitaanu, dikumi ne bisambombo. Bòbò abu's bàdi bàfwa dibà dyònsò edi.

Pa nanku bidimu byùdi naabi bìdi bishintulula cinyì? Cyùdiku wenza ncinyì pa bìdi bitàngila dibà dyùdi ne mwoyi? Cyùdiku wenza bwa Yesu ncinyì pa dibà edi? Nwamonu anyì? Kaa, mêmè ndi muswe kuMumona. Ndi muswe kumòna dibà dîngàatàngilà e kumòna mibidi yònsò eyi mishintulula, nyimòna

“mishintùlùke mu katanci, mu mubùnyì wà dísù.” Kabìyi nanku to, dībà adi twètù ki bàdì bantu bàà batàmbe kukùtakana; dyàku, nwàku, ne cyònkòmokààku, bwalu mààlabà ufwàfwà; wamonu’s, udi anu bu mùdì nyama amu, ufwà ne uya ku buloba ne pààkù kùmba kùjika. Kadi kùdì wa cifwàka... musuuka wùdì kawùyi wa cifwàka mwikàle ne mwoyi munda mwebe amu, mwaneetu. Twètù’s tukàadi bumvwe Dyulu dyàkula neetu. Tukàadi bacimòne cijaadikìibwe. Tudi bamanyè ne Yèyè ùdikù, ne mufuci wa aba bàdì bènda bàkèbangana Nendè ne lukunukunu.

Mpindyewu, nwènù bidimba bya Mubidi wà Kilisto, patùdì tuwimba cyakabidi apa, ndi muswe bwa nwikalè anu basòmbe mu nkwasu yenu amu ne nulabulangana ku cyanza muntu ne mukwèndè patùdì twimba cyòci aci cyakabidi apa.

Ndi . . .

Ela anu mwaneenu wa balume, wa bakaji awu mwoyi.

ndi muMunange
Bwalu . . . (Richard!) . . . kumpala
Ne wàkampetela lupandu
Pa mucu wà Kalvariyo.

²⁰⁶ Nudi baMunange anyi? Ambàayi ne: “Amen.” [Disangisha didi dyamba ne: “Amen.”—Muf.] Nudi banange Dìyì Dyèndè anyi? Ambàayi ne: “Amen.” [“Amen!”] Nudi banange bwalu Bwèndè anyi? Ambaayi ne: “Amen!” [“Amen!”] Nudi banange Mubidi Wèndè anyi? Ambàayi ne: “Amen!” [“Amen.”] Dībà adi, nudi banangàngàne muntu ne mukwèndè. Amen! Ncya bushuwa. “Ku eci bantu bònso nebàmanyè ne nudi bayiidi Bàanyi, panùdì nunangangana muntu ne mukwèndè.”

Mpindyewu ngàatentèki byanza pa mishwalà eyi, pìikalàbi bìkèngela bwa nwènù kuyàngata kumpala kwa dilòòlò edi.

²⁰⁷ Nèndombèku bwa Mwaneetu Richard Blair... Nzambi mmwandamune ku disambila dyèndè, yèyè ne mwaneetu wa balume ewu, basambile dituku adi, bwa kwaluja mwànà mukese wa balume udi musòmbe munkaci mwetu leelu ewu ewu, udi ne mwoyi ewu, bwa diitabuuya dyabo mu Nzambi. Mpindyewu nèmmulombèku bwa kutùtangalajayè ne mwaku wà disambila, mu katanci kakese cyanààna, bwa twamònakù mwa kwalukila cyakabidi dilòòlò edi.

Dībà dīcidi anu tusunsa bu tutaanu nanku paanyima pàa nkànkala, bilondèshile ntankù wàwa. Nenku ndi muswe bwa nwàlukilè dilòòlò edi, panwikalà ne mushindu, panwikalàpu. Byòbi bìkèngela bwa nwènù kwalukila ku mēènù, Nzambi ànwèndèshèku mu njila, ne ànwàmbùlwishè, ne ànùkùbè. Nwènù ne mushindu wà kushààla, ne baswè kushààla tudi tunùjingila dishààla dilenga. Nzambi ikalèku neenu mpindyewu.

Too ne patwàsangilà! too ne patwàsangilà!
Too ne...

Twèlàayi byanza byetu muulu kùdiYe.

...patwàsangilà ku makàsà a Yesu;
Too ne patwàsangilà! too ne patwàsangilà!
Nzambi ìkalè neenu too ne patwàsangilà
cyakabidi.

[Mwaneetu Branham wàbangi kwimbila mu matama *Nzambi ìkalè Neenù*—Muf.] Ki mushindu wà kuumuka mu nzubu wa Nzambi ngwôwò awu, mu nyuma wa disambila, ne didipwekesha, batwishìbwe ne netùsangilè cyakabidi dilòlò edi. Twêtù katùyi basangile to: “Nzambi ìkalè neenu too ne patwàsangilà cyakabidi!”

Twìnyikààyaaku mitu yetu mpindyewu. Mwaneetu Blair. 

KUTEETA BWA KWENZELA NZAMBI
MUDIMU KACIYI DISWA DYÀ NZAMBI LUA65-0718M
(Trying To Do God A Service Without Being The Will Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 18 a ngondo wa mwandamutekete, cidimu cya 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kâàdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org